

Korint Kimbi 2

Polnön Korint yeŋgöra kimbi aliga 2 ahök.

Jim-asa-asari

Pol aka Korint urumelen könagesö yeŋön urumohot ölpn̄i qahö aketka nalö miangören Polnön Masedonia mala kimbiŋi ki ohoyök. Tosatjan Pol tuarenjon köhöikn̄i ak waŋgetmö, Polnön töndup aŋgururuk memba et ala yembuk urumohot akingö kapan̄ kölok. Aŋgururukn̄ini tekömapkö urusösöŋgaiŋi kondel eŋgiyök.

Kimbi bahöŋi mutukn̄i (Boŋ 1-7) miangören Polnön Korint urumelen könagesö yembuk jöhöjöhö ahöhaŋgö keuŋi jiza. Könaŋi denöwögöra urumelen könagesö mi köhöikn̄anök jim eŋgiyök? Mewö aiga uruŋini meleŋda urumohot akერი, miangö sösöŋgaiŋi kondela jim asariza.

Kimbi bahöŋi 2 (Boŋ 8-9) miangören Judia urumelen könagesö bauköm eŋgiba naluk eŋgimegöra kuŋgum eŋgiza.

Kimbi bahöŋi 3 (Boŋ 10-13) miangö keuŋi kewö: Böhi takapulakaŋi tosatjan nanŋini qetn̄ini ‘Aposol öln̄i’ jiba Polgöra aposol muneŋi jigetka Polnön keu miangö likepni meleŋ eŋgiyök.

Buk kiangö bahöŋi bohonŋi 5 mi kewö:

Jim-asa-asari keu *1.1-11*

Pol aka Korint urumelen könagesö *1.12–7.16*

Judia urumelen kambu yeŋgöra naluk alme *8.1–9.15*

Polnön aposol öln̄i akzawaŋgö kukösumn̄i *10.1–13.10*

Keu teteköŋi *13.11-13*

1 ^a Anutunöŋ sihimŋaŋgö dop Pol ni kuŋgum niŋgiiga Kraist Jisösgö melaimelai azi aposol akzal. Nöŋön urumelen alanini Timotibuk tatzit. Korint sitinöŋ Anutugö urumelen könagesö maljei aka ambazip

^a 1.1 Apo 18.1

sarakñi pakpak Akaia prowinsñini dop köla maljei, netkôn embuk Buja keu eraum mötpingöra kaba kimbi ki ohozit.

²Anutu Iwinini aka Kembu Jisös Kraist yetkôn mönö kalem möriam enghiyohotka luainöñ malme.

Polnöñ Anutu urukölalepñangöra möpöseiza.

³Nini Kembunini Jisös Kraistkö Anutu Iwiñi möpöseimakzin. Yañön mönö ak-kömukömu Toñi aka urukölalep pakpak neñgimakzawangö Anutuñi akza.

⁴Nini kahasililiñ könani könani miwikñaimakzini, nalö miangörej Anutunöñ uruqesawölim neñgimakza. Uruqesawölim neñgii möta miangö qakñe kininga tosatñan kahasililiñ könani könani miwikñaimakzei, mi mönö ölop amqeba uruqesawölim enghimakin. ⁵Miangö könani kewö: Kraistpuk qekötahöinga yañgö sihimbölonñan qaknine öngöi kelejmalelej mörakzinmö, miangö dop uruqesawölim mewöñanök neñgii Kraist qekötahöinga urukölalepñan urunine geiga kelejmalelej mörakzin.

⁶Neñön köñjiliñ uruñe maljin ewö, Anutunöñ mönö iñini uru qesawölim enghii uruñini kumbuk melenña oyaenköyaen akñegöra mötza. Anutunöñ uru qesawölim neñgiiga enñon mi eka nanñinak uru qesawölim miwikñaima. Uru qesawölim enghimakzawangö ölnñan mönö uruñine kewö asuhumakza: Nini sihimbölö möringa enñon tok sihimbölö miyöhök miwikñaima ewö, mi mönö ölop möta mökösonña kin köhöiba malme. ⁷Sihimbölonñan qakñine öngöi mörakzei, uru kölalepnöñ mönö mewöñanök qakñine öngöi malje, mötzin. Mi möta miangöra enñon kin köhöimegöra mamböta jörömqöröm köhöikñi ahakzin.

⁸^bO urumelenñ alaurupni, nini Eisia prowins uruñe nup memba mala nupkö sihimbölö möta kahasililiñ miwikñaima möriini, iñini miangöra gukmaulem malbepuköra mötzin. Nupkö lömbötñan ösumnini ongita öngöngöñi aka mulumgöm neñgiiga kin köhöibingö osinmö, töndup kapañ kölinga mem et al neñgiiga malin. Mewö asuhuiga toroqeba malbin me qahöwi, miangöra mewöyök tötböröm aka malin.

⁹Mewö mala uruninan kewö mötmöriin: Kunöñ kömumbingö keuñi lök jim teköi keu miangön qaknine öngöi ayuhubingö mambörin. Nanini ösumnöñ nariba malbinbukmö, Anutu kukösum qakñe nariba malbingöra aka mewö asuhuyök. Anutunöñ kömukömuñi mem gulim enghii wahötmei, yañön mönö amqeba nini mewöyök bauköm neñgimakña.

¹⁰Kömumbinbukö keñgöt mötmöt öngöngöñi ahinmö, Anutunöñ mönö miangörejök meköm neñgiyök. Meköm neñgiyök aka toroqeba meköm neñgimakña. Nini jörömqörömnini Anutugörej ala mewö möt narim wangiba kinjin. ¹¹Iñini mewöyök bauköm neñgiba neñgöra

^b 1.8 1 Kor 15.32

aka köulukögetka meköm neŋgimaknya. Gwötpukŋan neŋgöra aka köulukögetka Anutunöŋ möta miangö likepŋi meleŋni kalem möriamŋan dop köl neŋgii neŋgehorimakŋa. Mewö meköm neŋgiiga alaurup gwötpukŋan mi möta neŋgöra aka mindiriba möpöseigetka köiraŋ köulukŋinan öŋgöba Anutugö kezapŋe gemakŋa. Miangöra mönö toroqeba nöŋgöra aka Anutu köulukömakŋe. Mewö qesizal.

Polnöŋ köna anangö areŋi uteköyök.

¹²Tosatŋi iŋini nöŋgö könaŋamnaŋgöra uruyahöt akzei, miangöra keu kewö jimam: Anutunöŋ solanŋi malbingö mörakzawi, neŋön miangö dop gölmeŋi gölmeŋi liliköba miangöreŋ ahakmeme sarakŋi mi pöndaŋ wuatangöba malin. Engö sutŋine mi mönö kapaŋ köla törörök wuatangöba malin. Mi gölme ambazip mötkutukutuninaŋgö dop qahöpmö, Anutugö kalem möriamŋan inahöm neŋgiyöhaŋgö dop mi aka memba malin. Anutunöŋ ahakmemeni mi eka naŋgöba “Dop kölja,” jiiga urukezapnan keu mi mörakzal aiga miangöra silenini memba öŋgömakzin.

¹³Kulem ohomakzali, miangö keuŋi pakpak mönö ölop oyoŋda möt asarimeangö dop akza. Keuŋi mi geŋmoŋi qahö. Keu könaŋi asa-asamböŋi kun qahö ohomakzal. Mi aukŋeyök ahöza. Miangöra nöŋgö könani mi körek möt asarim tekömegöra möta jörömqöröm akzal.

¹⁴Nöŋgö könani mi lök bahösapsap kewö möt asarize: Kembunini Jisösnöŋ kunbuk kamawi, nöŋön mönö nalö miangöreŋ engöra aka silenini memba öŋgömam. Miangö dop iŋini mewöyök ölop nöŋgöra aka silenini möpöseigetka dop kölma. Iŋini nöŋgö könani mewö möt asarim tekömegöra mötzal.

¹⁵Nöŋön keu miangö qakŋe awösamkakak kinalangöra aka mutuk engöreŋ kaba engekŋamgö areŋi alal. Indimŋi yahöt engekiga kötumötuet mötmegöra aka köna anmamgö areŋi kewö albi ahöyök: ¹⁶Masedonia prowinsnöŋ anmamgö könanöŋ mutuk iŋini engeka toroqeba Masedonia anda lilingöba kunbuk engöreŋ kamamgö jial. Kaba malbi yuai tosatŋi bauköm niŋgiba melaim niŋgigetka engömosöta Judia prowinsnöŋ anmamgö möral.

¹⁷Areŋni mewö albi ahöyökmö, mi uteköyal. Mewö aka an köl kam köl qakŋe möndöba laŋ qahö ahal. Nani areŋni mi gölme ambazipkö dop nanangöra laŋ mötmöriba qahö ahal. Mewö kude mötmörime. Numbu ösum mohot miangönök “Oŋ, ölop kamam!” aka “Qahö kamam!” keu yahöt mi mindiriba qahö jial. Mönö ahakmeme sarakŋi wuatangömakzal.

¹⁸Anutunöŋ keu jiba miangö dop pöndaŋ ahakzawi, neŋön mönö yangö jeŋe kewö jim köhöizin: Neŋön nalö kunöŋ “Oŋ, mi ölop akin,”

jim jöhöba miangö andöŋe “Mi qahö akin,” pötagororoŋ keu mewö meŋqeleŋ qahö jiba malin.

¹⁹ ^dAnutu Nahönŋangö könaŋi kewö: Nönön Sailas aka Timoti yetpuk engö sutŋine Kraist Jisösgö könaŋi jim asariba malinga yaŋön “Anutugö jitiŋi tem kölmam!” aka “Qahö tem kölmam!” keu jöl yahötyahötkö qakŋe meŋqeleŋda qahö kaba malökmö, Anutugöra keu jiba jöhöyöhi, miangöra mönö “Oŋ!” jiba miangö dop aka memba malök.

²⁰ Anutunöŋ jöhöjöhö keu (promis) sehisehiŋi dawik neŋgiyöhi, qötöŋini qahö mötzinmö, Kraistnöŋ keu körek miengöra “Oŋ!” jiba mem köhöiiga pöwöwöm ahöza. Miangöra Kraistnöŋ mewöyök nam köl neŋgi keu miengö ölninan asuhui möta “Keu mi ölja,” jibin. Mewö aHINGA Anutugö qetbuŋaŋan sehimakŋa.

²¹ Anutu nanŋak mönö nini aka iŋini mohot mem köhöim neŋgiiga Kraistpuk qekötahöba kin köhöibin. Yaŋön mönö Buŋa keu jim sehiringöra aka bedu mem neŋgi maljin. ²² Anutunöŋ urunine Uŋa Töröŋi mekötahöiga yaŋön oyaenŋkoyaen malbingö keuŋi naŋgöba jim köhöimakza. Anutunöŋ mewö aka buŋaŋi akzinangö muŋgem supapŋi mi mekötahöm neŋgiyök.

²³ Nönön tembula lömböt enggibileŋbuköra möta zilaŋ Korint engöreŋ qahö liliŋgöba kayal. Mewö jiba Anutugö qetŋi qetpi ölop keuni mi naŋgöba jima. ²⁴ Silik denöwö aka Anutu möt narimakzei, miangöreŋ kembu ak engimamgö qahö mötzal. Mötnariŋinan lök töndangöm engiiga kin köhöimakze. Miangöra sösongai qakŋe malmegöra bauköm engimamgö möta embuk mohotŋe urugö nup memakin. Mewö.

2 ¹ Mutuk engöreŋ kaba siksauk akerangöra jim enggibiga gamuŋini möta wösöbirik aket. Miangöra engöreŋ kabiga kunbuk mewö akepuköra möta urunan keu jöhöba köna anangö areŋni uteköyal.

² Miangö könaŋi kewö: Gamu qem enggibi wösöbirik akeak ewö, daŋön ölop uruni qesawölim niŋgiiga kunbuk sösongai miwikŋaibileŋak? Janjuŋinangöra aka jim enggibi wösöbirik akeak ewö, tosatŋan sösongai ak niŋgibingö osigetka nanak mewöyök wösöbirik aka malbileŋbuk. Miangöra zilaŋ kaba gamu qem engimamgö töközal.

³ Kimbi köhöikŋi mi könaŋi kewögöra ohoba alal: Nönön söngaibiga körek eŋön mönö nömbuk söngaime. Nönön iŋini körek mewö uruyahötŋi qahö möt narim engizal. Nönön tosatŋi engöra sösongai miwikŋaimamgö mötzalmö, kabiga könaŋamŋini sohoi laŋ malgetka eŋgeka wösöbirik akileŋbuk. ⁴ Wösöbirik akŋegöra kimbi mi qahö ohoyalmö, önöŋi qahö uru jöpaköm engimakzali, iŋini miangö könaŋi möt yakömegöra mönö keu köhöikŋi mi kimbinöŋ ohoyal. Urunan engöra aka waimanŋat ketanŋi möta köŋjiliŋ qakŋe tata imbilnan eriga ohoyal. Mewö.

^d 1.19 Apo 18.5

Kunjan kõna oŋgiröhi, yaŋgö ŋiŋgisöndokŋi mönö mosötme.

⁵Kunöŋ ŋiŋgisöndok aiga gamu aka wösöbirik asuhuyöhi, miaŋön mönö nöŋgö qakneyök qahöpmö, körek eŋgö qakŋine mewöyök öŋgöyök. Keu mi jim qaribi sohobapuköra mönö kewöyök jimam: Gamu miaŋön mönö körek dop köl eŋgii miaŋgöra gwötpuk me borom kun wösöbirik aket. ⁶Könagesö ölnan keuŋaŋgö likepŋi meleş waŋgigeri, miaŋön mönö dop köl waŋgii uruŋi kunbuk meleşnök.

⁷Nalö kewöŋe gamu aka wösöbirik keta bölökŋi möriga miaŋön jem keleşgöbapuköra mönö lömböt kude toroqem waŋgime. Lömböt qahöpmö, mönö kapaŋ köla ŋiŋgisöndokŋi mosöta urukölalep ak waŋgime. ⁸Miaŋgöra kewö uru kuŋgum eŋgizal: Iŋini mönö keu jöhöba urukalemŋini kunbuk toroqeba köhöiba kondel waŋgiba malme. ⁹Nöŋön kimbini mi kewögöra ohoyal: Iŋini nöŋgö keuni pakpak tem köla esapesapnöŋ kin köhöime me qahö tem köla töteköba etme, miaŋgö kõnaŋi kewöta mötmamgöra möta mi ohoyal.

¹⁰Iŋini kungö ŋiŋgisöndokŋi mosötze ewö, nöŋön mi mewöyök mosöt waŋgizal. Bölöŋi ak niŋgiyöhi, miaŋgöra qahö mötpi öŋgözapmö, eŋön kunbuk ölöwaka mindirim aŋgumegöra mötzal. Miaŋgöra bölöŋamŋi mi lök Kraistkö jeŋe ölna mosöt waŋgibiga teköyök. ¹¹Satanöŋ areŋi ala silenöŋ alal kõnaŋi kõnaŋi ahakzawi, miaŋgöra tönpin qahö maljal. Miaŋgöra Satanöŋ luhut al neŋgibapuköra aka azi miaŋgö ŋiŋgisöndokŋi mönö mosöt teköme. Mewö.

Polnöŋ Troas mala Taitusgöra waimanjat mörök.

¹²°Nöŋön Kraistkö Ölöwak Buŋaŋi jim sehimamgöra aka Troas taonöŋ anbiga Kembunöŋ nanju öröm niŋgiiga nupŋi miaŋgöreŋ memamgö amqeyök. ¹³Mewö amqeyökmö, urumeleŋ alani Taitus qahö miwikŋaibi keuŋini qahö jii möralaŋgöra aka waimanjat möta luainöŋ urune qahö ahöyök. Miaŋgöra yaizökzökŋini jiba eŋgömosöta Taitus jarumamgöra Masedonia prowinsnöŋ anal. Mewö.

Kraistnöŋ ösum neŋgiiga luhut alakzin.

¹⁴Neŋön Anutu kewögöra möpöseimakin: Kraistkö buŋa aka welenni qeinga Anutunöŋ nalö dop suahö galöm ewö aka neŋguaŋgiriga anda köiraŋ kölakzin. Luhutnöŋ plaua juraŋaŋgö wörönŋi ölöpŋi memba kaiga mörakzin. Miaŋgö dop Anutunöŋ nam köl neŋgiiga denike denike liliköba Kraistkö kõnaŋi jim asariinga aukŋe asuhum sehiba aniga gölme dop mörakze. Miaŋgöra Anutu möpöseimakzin.

¹⁵Miaŋgö kõnaŋi kewö: Neŋön ambazip Suep mire öŋgömei aka könöp sianöŋ gemei, yeŋgö sutŋine anda kainga wörönini sarakŋi mörakze.

° 2.12-13 Apo 20.1

Kraistkō kōnaŋi jim sehiinga Anutunōŋ nupninaŋgō wōrōnŋi mōt ölöwahakza.

¹⁶Kōnöp sianōŋ gemei, yeŋōn Buŋa keunini mōtketka miaŋōn keunini jim tekōiga kōmum kōhöimegō mōta mōnō qamōtkō mumu wōrōnŋi ewō akza. Suep mire öŋgōmei, yeŋōn Buŋa keunini mōtketka oyaenŋkoyaenŋ enŋimapkō mōta mōnō malmal kōmbōnaŋaŋgō wōrōnŋi umkōhöwakŋambuk ewō akza. Daŋōn nup mewōŋi memawaŋgō dop akza? ¹⁷Ambazip tosatŋi gwōtpukŋan mōnō ni ewō qahō akze. Yeŋōn malmalŋini naŋgōbingōra mōta Anutugōreŋ keu mi kölköl-örörō ewō laŋ memba ala jimakze. Nōŋōn yeŋgō dop qahō ahakzalmō, Kraist qekōtahōba kōŋbiŋ mosōta uruni sarakŋi aiga kinjal. Anutunōŋ melaim niŋgiyōhi, mi mōta yaŋgō jemesoholŋe kinda Buŋa keuŋi törörök jim sehimakzal. Mewō.

Jöhōjöhō areŋ dölökŋaŋgō nup meme ambazip akzin.

3 ¹Nanak kōnaŋamni kunbuk kōnahiba jim ölöwakŋamaŋgōra mōtmōriŋe me? Mi qahō. Nup meme ambazip tosatŋan Korint eŋōn yeŋgō kōnaŋini mōtmegōra mōta jim ölöwak kimbi ohobingō kapaŋ kölakze. Tosatŋan Korint eŋōn yeŋgō kōnaŋini naŋgōba jiba jim ölöwak kimbiŋi kimbiŋi ohomegōra iŋini kuŋgum enŋimakze. Nōŋōn nupni diŋdiŋanōk mealangōra jim ölöwak kimbi mewōŋaŋgōra qahō osizal. ²Anutunōŋ Korint iŋini börōne al enŋii letota wōlbōt kōtŋi aka nanŋinak nōŋgō jim ölöwak kimbini ewō akze. Anutunōŋ nōŋgō jim ölöwak kimbini mewō ohoiga ambazip körekŋan silik tandökŋini dölökŋi mi eka oyoŋmakze.

³Iŋini Kraistkō papia kimbi ewō akzei, miaŋōn aukŋe ahōza. Mosesnōŋ Kōna keuŋi naŋim oŋi iŋk miaŋōn kōt tafenōŋ ohoyōhi, iŋini miaŋgō dop qahō akzemō, Kraistnōŋ kimbiŋi enŋgō uruŋinaŋgō tafene kewō ohoi kinje: Neŋōn nup meinga öŋi asuhui Kraistnōŋ Anutu malmal kōhöikŋi Toŋaŋgō Uŋaŋi uruŋine ali letotket. Ambazipnōŋ nupninaŋgō öŋi mi eketka miaŋōn baukōm enŋiiga nupninaŋgō kōnaŋi mōt asarimakze.

⁴Kraistpuk qekōtahōinga Anutunōŋ nupninaŋgō tandökŋi mōtza. Miaŋgōra nup meinga iŋini Kraistkō buŋaŋi akeri, mi ölöp Anutugō jeŋe awōsamkakak kinda jizin. ⁵Nanini kōhökōhöi qakŋe nup ölöpŋi ki Anutugō jeŋe membinaŋgō dop akzini, mewō ölöp qahō jibin. Nanini yuai kunōŋ qahō lapingōmakzinmō, Anutunōŋ nanŋök inahōba mōtmōt neŋgiiga nup ki memakzin.

⁶Anutunōŋ inahōba mōtmōt neŋgiiga jöhōjöhō areŋ dölökŋaŋgō nup meme ambazip akzin. Mosesgō Kōna keuŋaŋgō kulemŋi mohot

† 3.3 Eks 24.12; Jer 31.33; Eze 11.19; 36.26 * 3.6 Jer 31.31

mohotkora urukönöp akinak ewö, keu mianjön mönö keunini jim teköiga kömum köhöibinak. Uña Töröñangö nup areñi jim asariinga yañön mem gulim neñgiiga mal köhöibin. Miangöra Köna keugö areñi miyök wuatangömegöra qahö kapan kölakzinmö, Uña Töröñi möt angön kölmegöra uru kuñgum eñgimakin. Mewö.

Jöhöjöhö areñ dölökñangö nupñi mi aködamunñambuk.

^{7h}Anutunöñ Köna keuñi jiba kulemñi kötnöñ möndömgöba ohoyökmö, ambazipnöñ mi qahö tem kölgetka Anutunöñ keu miangö dop kewöta likepñi melen eñgiiga kömumba köhömuñi mala kotket. Anutunöñ mutuk Köna keuñi neñgiiga nalö miangörej asakmararañan Mosesgö jemesoholñi qei asariyök. Asakmararañ mianjön waziba ayapkömawangö dop ahökmö, mi töndup Israel ambazipnöñ jemesoholñi törörök uba ekingö dop qahö aket. Gwötpuk asariyöhangöra mi osiget. Köna keugö Buña areñ walñan lök mewö asakmararañambuk asuhuyök.

⁸Mewö asuhuyökmö, Uña Töröñan Buña areñ dölökñi neñgii miangö asakmararañan asuhumawi, mianjön mönö jöhöjöhö areñ walñangö asakmararañi oñgita önöñi qahö asariba jenini gamugamu ahakña.

⁹Mutuk Mosesgö Köna keu asuhuba kewöt neñgiiga miangö dop könöp siagö buñaya akzin. Buña keu mi lök aködamunñambuk asuhuyök. Miangöra Anutunöñ keunini kewöta jim teköi solanibini, Buña keu miangö aködamunñan mönö keta bölökñi akza. Mianjön jöhöjöhö areñ walñangö aködamunñi mi gwötpuk oñgita qetbuñangambuk akza.

¹⁰Buña nup walñan mutuk aködamunñambuk ahökmö, mi Buña nup areñ dölökñambuk mindiriba kewöringa walñi mianjön mönö qetbuñañi qahö akza. Uña Töröñangö nup areñ miangö aködamunñan öngöngöñi akzawangöra nup areñ walñan mönö yuai omañi ewö akza.

¹¹Anutu amötqeqeñangö köna walñan lök waziba ayapkömawangö dop ahök. Mianjön lök asakmararañambuk asuhuyök. Miangöra köna dölökñi teteköñi qahö ahöm öngömawi, miangö asakmararañan mönö köna mutukñangö asakmararañi mi önöñi qahö oñgita jenini gamugamu ahakza.

¹²Jöhöjöhö dölökñan teteköñi qahö bauköm neñgiiga asakmararañan asuhumawi, mewö Anutu jörömqöröm al wangimakin. Miangöra keñgötnini qahöpmahöp möta awösamkakak kinda keu mi kusum eñgimakin. ¹³ⁱMosesnöñ Israel ambazip asakmararañ waziba ayapköyöhi, mi ehipepuköra manjat möta jemesoholñi opo jahönñan esuhuyök. Neñön miangö dop qahö ahakzinmö, Buñanini aukñeyök jimakin.

¹⁴Buña walñangö asakmararañi eketmö, uruñinan töndup gwözöñni lañ mala kotket. Nalö kewöñe mewöyök yuai kuññan mönö opo jöhan

^h 3.7 Eks 34.29 ⁱ 3.13 Eks 34.33

miaŋgö dop Juda ambazip gwötpuk yengö uruŋini gwözöŋni malje. Miaŋgöra Jöhöjöhö Walŋangö Buŋa keuŋi keuŋi oyonjei, miengö könaŋini mi törörök qahö möt asarimakze. Uruŋini melenŋa Kraistpuk toroqegetka mewö miaŋjönök mönö opo jöhanŋini mi qeköi möt asarime. ¹⁵Nalö kewöŋe mewöyök Mosesgö Köna keuŋi oyongetka yuai kunŋan mönö opo jöhan ewö uruŋini gwözöŋni mötmötŋinan lömbörii malje.

¹⁶Mewö maljemö, Buŋa Kimbigö keu kun kewö ahöza, “Mosesnön ‘Kembubuk eraum mötpit,’ jiba opo jöhanŋi mesoholneyök qeközapma.” Keu mewö ahöiga yengöreŋök kunŋan uruŋi melenŋa Kembubuk toroqezawi, nalö miaŋgöreŋök mönö yuai opo jöhanŋangö dop mi qeköi Anutugö amötqeŋangö könaŋi möt asarima. ¹⁷Keu miaŋjön “Kembugöra” jiba mi mönö Kembugö Uŋaŋangöra jiza. Kembugö Uŋa Töröŋan denike yengö uruŋine maljawi, yaŋön mönö siŋgisöndokŋinangö kösöŋi pösariga solanŋi (fri) malje. (Mewö mala solanŋi diŋdiŋi akingöra Köna keu wuatangöbingö qahö kapaŋ kölakze.)

¹⁸Miaŋgö dop urunini melenŋinga Kembugö asakmararaŋan körek neŋgö je mesoholnine kuŋguiga bilikbilik aliga jenini qahö esuhuinga ambazipnön neŋgeka Anutugö aködamunŋi qetpuk mi piliknön uba ehökö tandök ehakze. Nini mi qarim sehiba ehakŋeangö dop letorakin. Mewö letota aködamunŋi qetpuk mi qariba asariba Kembugö tandöktandök ahakin. Kembunön Uŋaya akzawi, yaŋgö asakmararaŋan mönö mewö mem letot neŋgimakza. Mewö.

Nini kouraŋen ewö ahinga Uŋa Töröŋan ölni akza.

4 ¹Anutunön ak kömum neŋgiyöhanŋö dop nup ki qaknine ali memakzini, miaŋgöra mönö böŋ kininga uruninan qahö etma. Qahö! ²Neŋön nup memegö köna tölapŋi gamuŋinambuk mi körek andö qein. Tilipqilip qahö aka Anutugö keuŋi qahö möwöramgömakzinmö, keu ölni mi aukŋeyök alakzin. Mewö Anutugö jemesoholŋe ambazip uruölöwak möt neŋgimegöra kininga jim ölöwak keuninan asuhui körekŋan keunön törörök jim neŋgibingö osimakze.

³Mewö ahakzinmö, iŋini tosatŋan kewö jimakze, “Polnön Ölöwak Buŋaŋi mi esuŋambuk jimakza.” Mewö jibileŋak ewö, esu miaŋjön könöp sianön gemei, mönö yengö uruŋine ahöba miaŋgöra gwözöŋniga qakömakze.

⁴Kraistnön Anutugö imutŋi akza. Kraistkö aködamunŋi mi nanŋi Ölöwak Buŋaŋan indela asakŋi ewö asarimakzapmö, yengö jeŋinan ömuŋ köli jipjap ahakza. Nalö kewöŋe bölöŋangö Kembuŋi gölme dop galöm köl eŋgimakzawi, yaŋön urumelenŋö kopa ambazip yengö mötmöt jeŋini mem gömöliiga laŋ malje. Miaŋgöra Ölöwak Buŋagö asakŋi ek asaribingö osimakze.

¹ 3.16 Eks 34.34

⁵Nani qetbuʻanan qarimapkō Buʻa keuʻi qahō jim asarimakzalmō, eʻjōn Kembu Jisōs Kraistkō kōnaʻi mōta jitʻi tem kōlmegōra uru kuŋgum eŋgimakzal. Neʻjōn Kembangō jitʻi wuatangōba iʻjini welen qem eŋgimakzin. ⁶^kKōnaʻi kewōgōra welen qem eŋgimakzin: Anutunōʻj mutuk kewō jim kutuyōk, “Asaknan mōnō sōʻnaup qeiga asarima.” Mewō jiyōhaʻjōn mōnō Buʻaʻangō asakʻi ali urunini qeiga asariyōk. Kraistnōʻj ahakmemenʻi aka meiga Anutugō asakmararaʻan jemesoholʻe asarii ekeri, Anutunōʻj nini miaŋgō kōnaʻi mōt kutubingōra kapaʻj kōlakza. Asakʻangō kōnaʻi jim sehibingōra aka asakʻi mi neŋgiyōk.

⁷Asakʻan urunini qei asariŋa mōtkutukutu miaŋgō bohonʻi mi milyōn kina oŋgita oŋgōŋgōʻi akzampō, silenini mi kouraʻen ewō amqeba julakza. Anutu asakʻan mōnō sile mewōʻangō uruʻe ahōza. Ambazipnōʻj miaŋgō kōnaʻi ekʻegōra Anutunōʻj areʻi al neŋgiyōk. Dopkeu miaŋgō kōnaʻi kewō: Kukōsum ōnōʻj qahō al neŋgimakzawi, mi neŋgōreʻjōk ōne asuhumakzawangō dop qahōpmō, Anutunōʻj mōnō miaŋgō Toʻji akza.

⁸Eu emu likep likep miaŋgōreʻjōk lōmbōt kōnaʻi kōnaʻi qaknine oŋgōba qōlōlōmbōrim neŋgigetka wahōjaliʻj mōrakzin. Mi mōrakzinmō, tōndup mienōʻn qahō qōzōjahōm neŋgigetka erakzin. Nalō tosatʻe juʻj ewō wangōmʻe qakōba kōna qahō miwikʻaimakzinmō, tōndup tōtbōrōm qahō ahakzin.

⁹Ambazipnōʻj sesewerowero ak neŋgimakzemō, Anutunōʻj andō qahō neŋgumakza. Ambazipnōʻj mulumgōm neŋgimakzemō, tōndup qahō ayuhumakzin. ¹⁰Jisōs qem kōmugeri, miaŋgō dop nini mewōʻnanōk buʻaʻi jim sehimakzinaʻngōra aka neŋguget kōmumbinbukō mōta anda kaba malʻjin. Jisōsbuk mal kōhōininga inahōm neŋgimakzawi, ambazipnōʻj miaŋgō kōnaʻi mōt kutumegōra aka mewō malbingō urumohot akzin.

¹¹Gōlmenōʻj jebuk mala Jisōsgō nupʻi memakzinaʻngōra aka nalō dop kōmumbingō dop akzin. Sileninan kōmumawangō dop akzampō, Jisōsnōʻj urunine mal kōhōiba silenini mem gulimakzawi, ambazipnōʻj miaŋgō ōlʻi ek asarimegōra aka kinʻjin. ¹²Nini nalō dop sihimbōlō mōta kōmumbingō dop ahakzinmō, nōʻjōn eŋgō sutʻine nup memba malali, eʻjōn miaŋgōra aka guliba malmal kōhōikʻe aŋgota mal oŋgōme.

¹³^lSumbara (Sam) kunōʻj keu kewō ohoget ahōza, “Anutu mōt nariba kōmupnōhōk mekōm niŋgimapkō kōulukōba malal.” Neʻjōn keu miaŋgō dop kōmupnōhōk mekōm neŋgimapkō mōt narizin. Mōtnaripkō Uʻja Tōrōʻj miyōk buʻa qem aŋguzinaʻngōra neʻjōn mōnō mewōyōk keunini jiba kōulukōmakzin. ¹⁴Anutunōʻj Kembu Jisōs mem guli kōmupnōhōk wahōrōhi, yaʻjōn mōnō nini mewōyōk mem gulim neŋgi wahōta

^k 4.6 Jen 1.3 ^l 4.13 Sum 116.10

Jisösbuk öngöinga jemesoholŋe al neŋgii embuk mohotŋe mal öngöbin. Mi mötzinaŋgöra aka keunini jiba köulukömakzin.

¹⁵Keunini jiba köuluköinga Anutugö kalem möriamŋan toroqeba ambazip sehisehiŋi dop köl eŋgima. Mewö aiga yeŋön amqeba Anutu kelenmaleleŋ möpöseigetka qetbuŋaŋan sehimakza. Eŋön mewöyök Anutu möpöseim sehimegöra mötzal. Miangöra lömböt könaŋi könaŋi bisiba aum-möriba maljin.

Mötnarip malmalŋaŋö tandök mi kewö:

¹⁶Nini mem gulim neŋgimapkö möta mönö böŋ qeba kininga uruninan qahö etma. Öŋa silenini ewö waziba soholimakzinmö, mi töndup urunini ewö nalö dop kölŋaimakzin. ¹⁷Mi kewögöra: Gölmenöŋ kahasililiŋ nalö töröptökŋi möta malbinmö, miangö andöŋe asakmararaŋ önöŋi qahö miwikŋaiba teteköŋi qahö oyaeŋkoyaeŋ malbin. Asakmararaŋ aka kahasililiŋ yahöt mi kewöt etkiinga asakmararaŋ miangön mönö öngöŋgöŋi aiga gölmegö kahasililiŋ könaŋi könaŋi mi möringa awamŋi aka eretŋi akza.

¹⁸Ambazip aka öroyuai jenöŋ ehekŋi mi nalöŋini teköi ayapkömemö, Suep mirigö öroyuaiŋi nalö kewöŋe qahö ehakzini, mieŋön mönö nalö teteköŋi qahö ahöm öngöme. Miangöra neŋön jeninan ehekŋi mia qahöpmö, qahö ehekŋi mönö mieŋgöreŋ göröken uba eŋgehakzin. Mewö.

Polnöŋ Suepkö oyaeŋkoyaeŋ koumnöŋ anmamgö mörök.

5 ¹Neŋön keu ki mötzin: Gölme silegö opo seri koumŋe malinga kömupnöŋ mi köndeŋniga etmawi, Anutunöŋ nalö miangöreŋ silegö miri dölökŋi nanŋak meiga Suepnöŋ ahömawi, mi buŋa qem neŋgiiga miangöreŋ malbin. Silegö miri qainŋi kun mi teteköŋi qahö köhöikŋi ahöm öngöma.

²Keu mi möta nalö sutŋe kiaŋgöreŋ letotpingö osoŋgom köla Suep malmal mirinine öngöbingö möta awöweŋgömakzin. ³Suepnöŋ öngöinga sile qainŋi kunöŋ löŋgöt neŋgii tatpini, nalö miangöreŋ mönö uŋa sile meinga kunŋan aukŋe qahö miwikŋaim neŋgima.

⁴Gölme sile ki qekömegöra qahö mötzinmö, Suep malmal mirinine öngöba silenini dölökŋi memingö awöweŋgömakzin. Sile ki kömumawi, mi malmal köhöikŋan gwahöri qahöwahiga Anutunöŋ salupŋe oyaeŋkoyaeŋ sileya neŋgimapkö mötzin. Miangöra nalö kewöŋe seri koum kiaŋgö uruŋe mala urulömbötnini bisiba letotpingö osoŋgom ahakzin. ⁵Anutu nanŋak Suep sile memingöra möta miwikŋaim neŋgiba Uŋa Töröŋi urunine aliga oyaeŋkoyaeŋ akingö dangunŋi akza.

⁶Miangöra neŋön mönö nalö dop ewebibininambuk saitŋgit mal köhöiba kewö mörakzin: Sileninaŋgö malmal koumnine ki malbini, nalö miangö dop eu Suep malmal mirinine Kembu Jisösbuk qahö malbin.

7 Nalö kewöŋe Suep mirigö öröyuaini qahö uba engehakzinmö, töndup mi möt nariba miaŋgö dop aka memba malinga nam köl neŋgimakze. 8 Miaŋgöra ewebibininambuk köhöiba sileninaŋgö malmal koumŋi ki mosötpingö kapaŋ köla mirinini ölni eu öŋgöba Kembubuk malbingö mötzin.

9 Miaŋgöra mirinine ki me eu malbini, neŋön mönö urunini Kambu Jisös uruölöwak ak waŋgibingöra jöhöba miaŋgöra köhöiba kapaŋ kölakzin. 10^m Miaŋgö könaŋi kewö: Körek neŋön mönö Kraistkö keu jakeŋe asuhubin. Gölmenöŋ silebuk mala Kembugö jitsihitŋi dopŋe tem kölini me qötömötötaŋ ahini me önewat laŋ malini, nanŋak mönö keunini mi kewöta miaŋgö dop töwanini nanŋök nanŋök neŋgii buŋa qem aŋgubin. Mewö.

Ambazip Anutubuk urumohot akŋegö nupŋi memakzin.

11 Kraistkö keu jakeŋe kinbini, neŋön mi möta Kembugö mötmötŋi oŋgitpinbuköra keŋgötnini mörakzin. Mi mötziŋaŋgöra ambazip könanini sarakŋi mötmegöra kapaŋ köla uru kuŋgum eŋgimakzin. Könaninan mönö Anutugö jeŋe aukŋe ahöza. Nöŋön tilipqilip azia qahö, eŋön mewöyök mi uruŋinan möt yakömegöra möta jörömqöröm akzal.

12 Mewö jiba nanini jim ölöwak keunini mötmegöra kunbuk qahö kapaŋ kölakzalmö, könanini miyök jim asarim eŋgimamgö mötzal. Inŋini mi möta ölop neŋgö silenini mi böhi takapulakaŋi yeŋgö jeŋine möpöseigetka dop kölma. Yeŋön yuai eŋgö uruŋine ahözawi, miaŋgöra qahöpmö, sileninaŋgö yuaiŋi jenöŋ ekingö dop akzawi, mönö miaŋgöra aiweliköba nanŋini silenini memba öŋgöba keu laŋ jimakze. Miaŋgöra keuni ki jizal. Eŋön yeŋgö keuŋini gilipitŋi (ambetakŋi) mötzeŋgöra mönö neŋgö könanini jim asariba törörök meleŋ eŋgime.

13 Eŋön nöŋgöra “Urusohop tandök ewö akza,” jiget ewö, nöŋön mönö Anutu nupŋaŋgöra aka urukönöp aka malal. Tosatŋan nöŋgöra kewö jize, “Urukönöpŋi qahöpmö, keuŋi ösöŋök jimakza,” Mewö jize ewö, mi mönö inŋini bauköm eŋgibingöra aka ahal. Miaŋgöra ölum eŋgubapuk.

14 Miaŋgö könaŋi kewö: Kraistnöŋ jöpaköm neŋgimakzawi, miaŋön mönö kondota kuŋgum neŋgiiga nupŋi memakzin. Azi mohotnöŋ körek neŋgö salupnine neŋgö kömupnina kömuyök. Miaŋgöra siŋgisöndokninaŋgö likepŋi qahö meleŋ neŋgiyökmö, körek neŋgö siŋgisöndoknini mosöri toroqeba köhömuŋi qahö akzin. Keu mi möt asariba möt yaközini, Kraistkö urukalemŋan mönö körek nini jölöŋgöba nupŋi memingöra kuŋgum neŋgimakza.

15 Yaŋön mönö kewögöra körek neŋgö salupnine kömuyök: Gölmenöŋ jebuk maljini, neŋön mönö malmalnini toroqeba naninaŋgörök

^m 5.10 Rom 14.10

malbinbuk. Mewö qahöpmö, kun neŋgöra aka kömumba wahöröhi, malmalnini mönö yaŋgöra tököba ala malbingöra kömuyök.

¹⁶Miaŋgöra urunini melenjini, nalö miaŋgöreŋök könahiba ambazip silesile qahö kewöt engizin. Ambazip kun gölmenöŋ silikŋaŋgö dowök qahö möt kutum waŋgizin. Mutuk Kraist kewöta möringa gölme azi töhön ahökmö, nalö kewöŋe möt kutum waŋgiinga Suepkö Amötqeŋe Tonina akza. ¹⁷Miaŋgöra kunŋan Kraistpuk qekötahöza ewö, yaŋön mönö ahuahü dölökŋi ahüba döŋŋi dölökŋi akza. Malmal walŋan ayapköiga malmal dölökŋan mönö salupŋe asuhum waŋgiza.

¹⁸Mewö maljapmö, yuai pakpak miaŋgö kondotkondot Toŋi mi Anutu. Yaŋön Kraist melaiiga töwanini qeba neŋgömeiga Anutu nanŋambuk urumohot akingö könaŋi möwölöhöyök. Köna mewö asuhüiga Anutunöŋ nup neŋgiiga neŋön ambazip Anutugö alaurupŋi akŋegöra jölöŋgöba kuŋgum engimakzin.

¹⁹Anutubuk urumohot akingö könaŋi kewö: Kraistnöŋ eta gölmeŋi gölmeŋi neŋgö töwanini qeiga dop köli Anutunöŋ neŋgömeiga alaurupŋi ahin. Köna oŋgita mala korini, siŋgisöndok miengö keuŋini qahö oyoŋda mötmöröba likeŋŋi qahö melenj neŋgiyök. Anutugö alaurupŋi ahinga möt narim neŋgiba Kraistkö töwagöra aka Anutubuk urumohot akingö Buŋa keuŋi mi böröŋine alök.

²⁰Mi aliga Kraistkö jiteŋememeurupŋi akzin. Anutunöŋ keu saŋep al neŋgii miaŋgö dop ambazip uruŋini kuŋgum engimakzin. Kraistkö jiteŋi mamba kapaŋ köla kewö qesim engimakzin: Mönö Kraistkö töwaŋi buŋa qem aŋguba Anutugö alaurupŋi akŋe. ²¹Anutunöŋ körek neŋgö siŋgisöndokninangö keuŋi jim teköba likeŋŋi melenjda Kraist siŋgisöndok kun qahö ahöhaŋgö qakŋe ali öŋgöiga salupŋine sihimbölö mörök. Kraistkö sihimbölöŋi miaŋgöra aka yaŋgöreŋ qekötahöinga Anutunöŋ ölop keunini jim teköi solanibin. Mewö.

6 ¹Nini Anutu nanŋaŋgö nup meme alaurupŋi akzinangöra aka uruŋini kewö kuŋguzin: Anutugö kalem möriamŋan omaŋi akapuköra mi mönö buŋa qem aŋguba malme. ²^aAnutunöŋ keu kun kewö jii Buŋa Kimbinöŋ ahöza,

“Gehorimangö nalönan kam kuŋguiga nöŋön köuluki möral.

Amötqeŋe nalönan kam kuŋguiga miaŋgöreŋ bauköm gihial.”

Keu mewö ahöiga mötket! Nalö dölkiaŋön mönö Anutugö amötqeŋe nalöŋi akza. Anutunöŋ engehorimangö möri nalöŋan kam kuŋguiga akkömükömuŋi mi mönö dölkü buŋa qem aŋgume. Mewö.

Polnöŋ kahasililiŋ könaŋi könaŋi miwikŋaiyök.

³Neŋön mönö kungö uruŋan neŋgöra aka bölii etpapuköra galömnini mem aŋgumakzin. Jim neŋgigetka nupninan keuŋambuk aka

^a 6.2 Ais 49.8

etpapuköra mewö ahakzin. ⁴Anutugö nup meme ambazip ölop sorokni akzini, ahakmeme pakpakninan mönö mi kondelakza. Kahasililiñ aka jaŋgauranğa könani könani ak neŋgigetka wahöjalin uruñe maljinmö, miangören mönö mökösoñda kapañ köla kin köhöimakzin.

⁵Ihilek wahinambuknöñ neŋguba kösö miriñ miriñ miangören al neŋgigetka malin. Karimni karimni asuhugetka miangö uruñe kömumbinbukö keŋgoñnini möta malin. Gaun guli aka nenegöra wösönini aliga malinmö, töndup silenini qeba nup memba malin.

⁶Ahakmeme sarakni wuatangöba Anutugö sihimni möt asariba lömböt möta mökösoñda ambazip ala ak eŋgimakzin. Uña Töröñan urunini kokolak qeiga sutñine geñmoñi qahö jöpaköm eŋgiba maljin. ⁷Keu öñanök jiinga Anutugö kukösumñan bohon köl neŋgiiga ahakmeme solanñangö timbi saiwanj meinga böro ölnine aka qaninine ahöiga kinjin. Mewö kinda likep Buña keu jim sehiba likep keu muneni silenine algetka miangö likepñi jim mindinğöba malin.

⁸Qetbuña neŋgigetka silenini qahö möpöseimakzin. Yom jiba gamu qem neŋgigetka uruninan qahö erakza. Neŋgöra kösohot ölopni kösohot bölöñi mi lañ jimakze. Munen jiji ambazip ewö ak neŋgimakzemö, töndup keu öñanök pakpak jimakzin.

⁹Ambazipnöñ könanini ölop möt kutumakzemö, töndup tosatñan nönöñgan aka nesampurek ak neŋgimakze. Nalö tosatñe kömumbingö aka malinmö, töndup toroqeba jebuk maljin. Kegwek-kahasililiñ ewö neŋguba malgetmö, töndup qahö kömuin. ¹⁰Wösöbiriknöñ neŋguiga töndup nalö dop soñgaiba maljin. Wanapñi mala töndup ambazip gwötpuk bauköm eŋgiinga uruñinan pomñi ahakze. Gölmeğö sukinapnini qahöpmö, töndup oyaenköyaen pakpak buña qem aŋguba pipsimbawoñ maljin.

¹¹O Korint ambazip, neñön mönö uruninañgö nañguñi eŋgöra öröba keu kun qahö kölin geiga könanini aukñeyök jibiga mötze. ¹²Eñön neŋgö urumötmötnini mötpepuköra mi qahö aŋgön kölakzinmö, neñön eŋgö uruñini mötpinbuköra mönö nanñinanök aŋgön köl aŋgumakze.

¹³Nöñön urumötmötni eŋgibiga eñön mönö miangö likepñi mewöyök törörök niñgime. Nöñön nahönböraturopni ewö tandök keu eŋgöra kewö jiba ohozal: Injini mewöyök mönö nanñini uruñinañgö nañguñi öröba urukalemñini mi sehiba kondel neŋgime. Mewö.

Mötnarijini qahö yembuk kude qekötahöme.

¹⁴Ambazip uruñini qahö meleñgeri, yembuk mönö uruñini kude jöhöba^p öröröñ kude malme. Malmal solanñi aka malmal goñgoñi mi

^o 6.5 Apo 16.23 ^p 6.14 Könjöh me mötöp (yoke) mi hos me bulkamau yahötkö imbiñire alget geiga kare me kinöñ yuai örömakzahot. Mewö nanñiri imbi-imbi akitkö osimakzahot. Mewö jañjuñ anbanbuk.

nanjök nanjök akzahot. Mi mindirim etkibingö osibin. Söjauþ aka asakñi mi mohotñe qahö akzahot. Qahö! ¹⁵Kraist aka Katakömulat (Satan) yetkön mönö urumohot aka mohotñe malbitkö osimahot. Miañgöra urumeleñ ambazip kunñan ahakmemerñi urumeleñgö kopa ambazip kun yambuk mohotñe mindiriba akitkö osimakñahot. ¹⁶“Anutu nanjak keuñi kun kewö jii ahöza,

“Nöñön könagesöni yeñgö uruñine mala sutñine anda kaba Kambuñini ak engibiga yeñön nöñgö weleni qeba möpöseim niñgiba malme.”

Keu miañgö dop Anutugö Uñañan uruñine maliga sileninan Anutu malmal köhöikñi Toñañgö jikeñi akza. Anutunöñ nanñi jöwöwöl jikeñe tandö lopioñ möpöseibingö soñgo ali ahöi osimakzin. Anutugö jikeñi aka asa jikeñi mi inanñök inanñök. Miañgö dop neñön urumeleñgö kopa ambazip yembuk qekötahöbingö soñgo ali ahöi osimakzin.

¹⁷Miañgöra iñini mönö Kembunöñ keu kewö jiyöhañgö dop akñe,

“I mönö eñgömosöta yaigep kaba kambu nanñi kun malme.

Añgöjörakñinambuk ahakzei, mi mönö kude eñgoseigetka nöñön möt añgön köla köyan köl eñgiba malmam.

¹⁸ Nöñön mönö Iwiñini akiga iñini nöñgö nahönböraturupni aka malme.

Kembu kukösum pakpakö Toñan mewö jiza.” Mewö.

7 ¹O wölböt alaurupni, Anutunöñ mönö köyan köl neñgimamgö keuñi mewö jöhöm neñgii ahöza. Miañgöra yuai sile uñanini mem tölöhozawi, neñön mönö mi körek qeköbingöra Kraist köuluköinga amöt qem neñgima. Anutugö jitñi oñgitpinbuköra mönö keñgötnini möta kapaj kölinga mem solanim neñgiiga sarakñi ak teköbin. Mewö.

Uruñini meleñgerañgöra Polnöñ uruölöwak mörök.

²Neñön kun qahö mem bölim wangiinga ayuhuyök. Kun qahö geñmororoñ ak wangiin. Miañgöra eñön mönö uruñinañgö nanñuñi öröba nini urunöñ jöhöm neñgiba malme. ³Tosatñan sutñine nup memba silenöñ alal keu mewö jiba jim neñgigetmö, nöñön keu mi eñgö keuñini jim teköba likepñi meleñ eñgimamgöra aka qahö jizal. Nöñön lök keu kewö jibi mötket: Neñön uruninañgö nanñuñi öröba iñini uruninan jöhöm eñgimakzin. Mewö aka ölöp embuk öröröñ jöhöba kömumbin aka öröröñ mal köhöibin.

⁴Eñgö uruyahöt qahö mötnaripni ketañi eñgiba maljal. Eñgö silenini mönö gwötpuk möpöseimakzal. Eñgöra aka urukölalepni ketañi miwikñajazalañgöra kahasililiñ könañi könañi möta miañgöreñ mönö töndup önöñi qahö söñgaizal.

^a 6.16 Lew 26.12; Eze 37.27; 1 Kor 3.16; 6.19; Ais 52.11; 2 Sml 7.14; 1 Hist 17.13; Ais 43.6; Jer 31.9

Masedonia prowinsnōḡ anda Taitusbuk aitōḡōit.

⁵Taitus jaruba malalaḡōra^s jiali, keu mi toroqeba jimam. Masedonia prowinsnōḡ kaḡgota miāḡōreḡ mōnō mewōyōk uruluai miwikḡaimamḡō osial. Denike denike anali, miāḡōreḡ mōnō kōḡjiliḡ kōnaḡi kōnaḡi miwikḡaial. Anutugō bim qeba tosatḡi yembuk aḡgururuk aka eḡōra waimanḡat mōta malal. ⁶Mewō malalmō, Anutunōḡ urueret ambazip naḡḡōm neḡgimakzawi, yaḡōn mōnō Taitus kayōhi, miāḡōn urukōlalep ak niḡḡiyōk.

⁷Taitusnōḡ kayōhi, miāḡōnōk qahōpmō, Korint eḡōn urukōlalep ak waḡḡigetka yaḡōn jii mōtpiga Anutunōḡ miāḡōn mewōyōk urukōlalep ak niḡḡiyōk. Eḡō kōsohotḡini kewō jiyōk, “Eḡōn ni nekingō kōpōsōḡōba kinje. Wōsōḡini ōḡa mōt niḡḡiba lōmbōt niḡḡigerāḡō keuḡi jiba nōḡḡō likepne naḡḡōba jibingō jōjōrōmakze.” Kōsohot mi jii mōta urusōsōḡgai keta bōlōkḡi mōral.

⁸Nōḡōn uruḡini Buḡa keunōḡ kuḡguba kimbi mi ohobi oyoḡda nanḡini mōt bōlim aḡgugeri, miāḡōra qahō mōt bōlim aḡguzal. Mutuk mōt bōlim aḡguyali, mi tōndup nalō kewōḡe kewōḡōra kunbuk sōḡaizal: Kimbi keunan uruḡini mem bōlii wōsōbirik aketmō, wōsōbirik miāḡōn mōnō meleḡda nalō tōrōptōkḡanōk ahōba tekōyōk. Kōnaḡini mewō ehal.

⁹Nalō kewōḡe iḡini mōt bōlim aḡgugeraḡōra aka qahō sōḡaizalmō, kewōḡōra sōḡaizal: Iḡini ahakmemeninaḡōra aka mōt bōlim aḡgugetka gamu wōsōbirikḡinan baukōm eḡḡiiga uruḡini kunbuk meleḡda diḡḡiget. Mi Anutugō jitḡaḡḡō dop asuhuiga uruḡinan mōnō neḡḡōra aka qahō bōliyōkmō, ōḡa baukōm eḡḡial.

¹⁰Siḡḡisōndōkḡinaḡōra aka mōt bōlim aḡguzin ewō, gamu wōsōbirik miāḡōn mōnō baukōm neḡḡiiga urunini kunbuk meleḡda diḡḡibin. Diḡḡibinaḡōreḡ Anutunōḡ mōnō neḡḡuaḡḡiri Suepnōḡ ōḡḡōbin. Miāḡōra kunḡan uruḡi meleḡda miāḡōra qahō mōt bōlim aḡguma. Gōlme ambazip tosatḡan siḡḡisōndokḡinaḡō wōsōbirik mōrakzemō, Anutunōḡ mi mosōtmapkō qahō qesime ewō, yaḡōn mōnō likepḡi meleḡ eḡḡiiga kōmum kōhōime.

¹¹Eḡōn Anutugō sihimḡaḡḡō dop wōsōbirik aketka gamu miāḡō ōḡan uruḡine ahui letotkeri, mi kewōta ek welipkōba kewō jime, “Nini gōnmōnahotnini mosōta urunini tokoba urukōnōp qakḡe wahōta kōnanini sohosohoḡi kewōta mindiḡḡōin. Ambazip siḡḡisōndok akeri, miēḡōra uruninan wahōri sisit memba jim eḡḡiin. Anutugō jitḡi oḡḡitpinbukōra auruba keḡḡōtnini mōta Polnōḡ kaba uru meleḡḡinaḡō ōḡḡi ekḡapkō kōpōsōḡōba malin. Urunini ahakmeme diḡḡiḡi akingōra alin aka kunōḡ kōna qiwitipkōyōhi, mi mindiḡḡōm waḡḡibingō jōjōrōba

^r 7.5 2 Kor 2.13 ^s 7.5 2 Kor 2.13 miāḡōreḡ Taitusgōra jiyōk.

malin.” Mewö jigetka dop kölma. Nalö kewöñe köna diñdiñi wuatangözei, mi kondel ningigetka ehal.

¹² Mianğöra kunjan sutñine böliyöhi, iyök mindiñgöm wañgimeğöra aka kimbini qahö ohoyal me kun i mem bölim wañgiyöhi, iyök bauköm eñgimeğöra kimbi mi qahö ohoba alal. Mi kewögöra ohoyal: Injini Anutugö jemesoholñe nömbuk urumohot akingö kapan kölakzei, silik mianğön mönö aukñe asuhumapköra kimbi mi ohoyal.

¹³ Nani urukölalepni miyök qahö mötzalmö, Taitusgö uruñan sutñine ölöwahi ehinga mianğön mewöyök uruni nañgöi önöñi qahö söñgaimakzal. Eñön körekñanök Taitus körö-ölöwak qem wañgigerañgöra söñgaimakzawi, söñgagai mianğön mönö mewöyök nañgöm köl niñgii mianğöra önöñi qahö söñgaizal. ¹⁴ Nöñön silikñinañgöra silenini Taitusgö jeñe möpöseiba malali, eñön mianğöra gamu qahö niñgiget. Nöñön eñgö sutñine mala keu pakpak jibi mötkeri, mi öñanök jial. Mianğö dop eñgö keuñini Taitusgö jeñe jim möpöseiba malali, keu mianğön mönö mewöñanök könañini mindiñgögetka öñi ahök.

¹⁵ Injini körek pakpak mönö nöñgö keuni tem köla Taitusnöñ kaiga sömbuñnambuk möta jönömñini undui köl öröm wañgiget. Taitusnöñ silikñini mi mötmöriba keu jiiga uru ölöwakñan eñgöra aka qariiga köhöiba möpöseim eñgimakza. ¹⁶ Nöñön ahakmemeñini pakpak mötmöriba mianğöreñ mönö ölop eñgöra aka ewebibinambuk möt köhöiba saitingit malmam. Mianğöra söñgaimakzal. Mewö.

Urumeleñ alaurup nañgöm eñgibingö keuñi

8 ¹ O urumeleñ alaurupni, Anutunöñ kalem möriamñi urumeleñ könagesöñi könagesöñi mianğöreñ neñgii öñan mönö Masedonia prowins uruñe ölopñanök asuhuyök. Nöñön injini mianğöra gukmaulem malbepuköra möta kösohotñi kewö jimam: ² Yeñön kahasililiñ miwikñaiba mötketka lömbötñambuk esapköm eñgiiga wanapñi kötökñi maljemö, mi töndup önöñi qahö söñgaigerañgöra aka urumeleñ alaurup nañgöm eñgibingöra moneñ naluk keta bölökñi alget.

³ Yeñgö könañini kewö nañgöba jimam: Kunjan qahö kuñgum eñgii nanñini sihimñinan töndup ahuiga amqeba ösumñinañgö dop nalukñini alget aka mi tok oñgita eñgiget. ⁴ Yeñön mönö kapan köla gwötput kuñgum neñgiba kewö uleta jiget, “Nini tok Judia prowinsgö ambazip sarakñi bauköm eñgibingö mötzin. Mianğöra Pol, gi ölop Oñ! jinöñga mönö simbawoñ möta nup mianğö bahöñi amqeba membin.”

⁵ Mewö jiget jibiga naluk almegö mambörali, mianğö dowök qahöpmö, mi oñgita kewö aket: Yeñön mutuk nañgönañgö Kembugö jeñe dop köljawi, mi akingöra uruñini jöhöget aka mianğö andöñe Anutugö jitñi

¹ 8.1-4 Rom 15.26; Eks 16.18

tem kölbängö möta nanjini malmalnjini mi mewöyök neŋgö börönine alget. ⁶Miaŋgöra Taitus kewö jim kutum waŋgial, “Gi mönö naŋgönaŋgö nup mi lök könahiba menöŋ. Miaŋgöra mi mönö toroqeba Korint könagesö bauköm eŋginöŋga urukalemnjini kondela moneŋ naluk ketaŋi mi kunbuk toroqeba algetka sutjine teköma.”

⁷Urugö yuai könaŋi könaŋi mi keleŋmaleleŋ buŋa qem aŋguba kewö aka malje: Ölöŋŋanök Kraist möt nariba Buŋa keu ölni jim soroköba Anutugö sihimŋi möt kutuba tosatŋi naŋgöm eŋgibingö pöndaŋ köpösöŋgömakze. Eŋön mönö tosatŋi eŋgoŋgita ölöŋŋanök jöpaköm neŋgiba qetpuk akze. Miaŋgö dop naŋgönaŋgö nup ki mewöyök mönö ölöŋ mem soroköba tosatŋi eŋgoŋgitketka qetpuk akŋa.

⁸Mewö jiba moneŋ almegöra qahö jim kutum eŋgizal. Mi qahöpmö, urukalemnjini geŋmoŋambuk akza me qahöwi, mönö mi esapesapnöŋ ala könaŋini mötmamgö mötzal. Könagesö tosatŋan gönmönahot mosöta naŋgönaŋgö nupjini ö! töhöŋŋa memba zeŋ kinjei, keu mi jiba miaŋön iŋjini esapköm eŋgizal.

⁹Naluk dawik almegöra kewötmei, miaŋgöreŋ mönö Kembunini Jisös Kraistkö könaŋaŋgö tandökŋi mötmörime. Ijini yaŋgö kalem möriamŋi ketaŋi mi kewö mötze: Yaŋön Suepkö öroyuai pakpakö Toŋi öŋgöŋgöŋi ahökmö, töndup iŋjini oyaeŋkoyaeŋgö pomŋi akŋegöra aka gölmenöŋ eta etqeŋeŋi aka malmalŋi tököba mosörök.

¹⁰Moneŋ almegöra qahö jim kutum eŋgizalmö, Jisösnöŋ söpsöp alöhi, miaŋgö dop qambaŋni miyök eŋgizal. Eŋön yambu emune lök naŋgönaŋgögö mutukŋi aka miaŋgö nupŋi kapaŋ köla meget aka mi toroqeba membingö sihimŋi köhöikŋi mötket. ¹¹Nalö kewöŋe nupjini mi mönö mem teköme. Mutuk naŋgönaŋgö nup membingö kapaŋ köla awöweŋgögeri, miaŋgö dop mi mönö toroqeba mem teköme. Yuai ahöm eŋgizawaŋgö dop mönö nalukŋini gwötpuk alme. ¹²Miaŋgö könaŋi kewö: Naluk albingö sihimŋinan ahuba ahöza ewö, mönö yuai ahöm eŋgizawaŋgö dop algetka Anutunöŋ möt aŋgön köli dop kölja. Yuai qahö ahöm eŋgizawaŋgö dop mönö qahö kewöta jim eŋgimakza.

¹³Naluk ketaŋi algetka alaurup yeŋgö malmalŋinan amqeiga nanjini qakŋine lömböt öŋgömapköra qahö mötzinmö, alaurup osiba mözöröŋgözei, yembuk mendeŋda öröröŋ malbingöra mötzin.

¹⁴Miaŋgöra nalö kewöŋe yuai keleŋmaleleŋ ahöm eŋgiiga tosatŋan malmalŋinaŋgö yuaigöra osizei, iŋjini mönö mi bauköm eŋgigetka dopŋe akŋa. Mewö aka nanjini könaŋgep yuaigö osigetka yeŋgö öroyuaiŋinan keleŋmaleleŋ ahömawi, nalö miaŋgöreŋ mönö i kun bauköm eŋgime. Mewö ak aŋgugetka alabauk silikŋinan öröröŋ akŋa. ¹⁵Mi Buŋa keu ki ohoget ahözawaŋgö dop akŋa, “Gwötpuk mem tokoba malgeraŋön nanjini dop negetka numbu surukŋini qahö ahöiga boromborom mem tokoba malgeraŋön nene yuaigöra qahö osiget.” Mewö.

Neñakurup karöbut melaim engiinga kaba baukôm engime.

¹⁶ Anutunöj Taitusgö urunji sölölohöiga engöra ni ewö waimanjat möta baukôm engimamgö kapañ köla malja. Miangöra “Anutu saiwap!” jizal. ¹⁷ Nöñön Taitus engören kamapkö qesiba urunji kuñgubiga imbiñi meleşnök. Miyök qahöpmö, nanñak injini baukôm engimamgö möta köpösöngöba nanñi sihimñangö dop neñgömosöta Korint engören kamamgö jiyök. ¹⁸ Neñön urumelej alanini kun melaininga yambuk kamahot. Kiañgören Ölöwak Buña jim sehimakzawangöra i mönö urumelej könagesö dop möpöseim wangimakze.

¹⁹ Yangö keunji toroqeba kewö jimam: Masedonia urumelej könagesö yeñön mönö i möwölöhögetka nañgönañgö nalukñi mi memba nembuk mohotje köna anbin. Neñön Kembu nanñangö qetbuñanan sehimapköra möta naluk ketañi mi ölop galöm köla Judia prowinsnöj anda engibin. Alabauk engibingö urukalemnini mewö aukñe kondeljin.

²⁰ Mewö aka nañgönañgö naluk ketañi mi tilipqilip asuhui sohobapuköra ölop galöm köl soroköbin. Kunñan siliknini miangöra jim neñgibapukö möta kapañ köla kinjin. ²¹ “Keu miangö könañi kewö: Neñön silik Kembugö jeje diñdiñi akzawi, mi qötöñgatpinbukö galöm mem angumakzin. Miyök qahöpmö, silik ambazip jeñine dop köljawi, mi mewöyök akingö möta kapañ köljin.

²² Yetpuk urumelej alanini kun mi mewöyök melaininga kama. I nalö gwötpuk esapköm wangiba tandökñi kewö ehin: Yangön mönö nalöñi nalöñi Kembugö nupñi memamgö könöpkönöp ahakza. Nalö kewöñe injini tosatñi alabauk engibingö mötzei, mewö möt narim engizawangöra mönö engören kaba baukôm engimamgö möta urukönöp ketañi ahakza.

²³ Nöñön Taitus kewögöra möwölöhöyal: Yangön nöñgö alabaukni aka nup meme neñakni akza. Urumelej könagesöñi könagesöñi yeñön alayahötnini yahöt mi möwölöhöm etkigetka jitñememenjini akzahot. Kraistkö qetbuñanan mönö yetköra aka qarimakza. ²⁴ Miangöra azi karöbut mi kamei, i mönö urukalem ak engiba könañini mewö kondelgetka ekñe. Mewö akñe ewö, neñön silikñinañgöra silenjini möpöseinini, keu miangö ölnan mönö aukñe asuhuiga etekta urumelej könagesö gwötpuk yeñön mötme. Mewö.

Mönö urumelej alaurupñini baukôm engime.

9 ¹ Anutugö ambazip sarakñi alabauk monej engimegöra ohomamgö mötzalmö, injini keu mi lök möta miangöra qahö osize. ² Injini alabauk akingö sihimñinan ahui mötze. Nöñön mi möta engö silenjini mi miangöra Masedonia urumelej ambazip yeñgö jeñine möpöseiba

^u 8.21 Qam 3.4

kewö jial, “Korint aka Akaia urumelenj alaurup tosatanj monö yambu emuneyök könahiba Judia alabauk ak enggingö jöjöröba malje.” Mewö jibiga engö urukönöpñinanğöra mötketka keu miañön monö kuñgum engiyök. Miañğöra könagesö ölnj yengö uruñinan monö amqeba alabauk akingö urukönöp aket.

³Engö sihimñinan ahui mötzmö, töndup nejakurupni karöbut ki melaim engizal. “Korint yeñön monö monej tokobingöra jöjöröba malje,” mewö jial aka keu miañğöra engö silenini möpöseial. Keu miañön omanj aiga gwötpukñan ekepukmö, keuñinanğö dop monej ölna algetka kahaimök tari körekñan mewö engekñegöra mötzal.

⁴Keu miañön omanj aiga moneñinan qahö kahaimök tari öne malgetka Masedonia nejakurup tosatanj nömbuk kaba mewö miwikñaim engibeak ewö, nöñön monö engöra aka gamu miwikñabileñbuk. Tem kölmegö möt narim engiba malbiga ölnj qahö asuhubawak ewö, inini monö mewöñanök keuñini omanñğöra aka gamu miwikñabilepuk.

⁵Miañğöra urumelenj alaurupnini karöbut mi uru kuñgum engimamgö mötpi dop köli kewö jial, “Inini monö qeljine Korint yengöreñ anda nanğönangö naluk ketanj almegö keu jöhögeri, areñ mi wuatangöba al tekömegöra monö kuñgum engime. Mewö aketka alabauk nalukñini mi kik-kukñambuk ekbonep qakñe qahöpmö, monö sakalakñi aka amqeba gwötpuk alme. Mi mindirigetka zioz köwenöñ kahaimök tari kabiga ölöp membini.” Mewö jial.

Kötñi monö amqeba gwötpuk qesiñda gilme.

⁶Keu ki monö mötmöriba malme: Nene kötñi awamñanök qesiñda giljawanñön monö ölnj mewöyök awamñanök mema. Nene kötñi gwötpuk qesiñda giljawanñön monö ölnj mewöyök gwötpuk mema. Miañğöra gwötpuk algetka Anutunöñ salupñe gwötpuk engima. ⁷Inini nanñök nanñök nalukñini monö uruñinan jöhögerangö dop alakñe. Sösöngainöñ amqeba mözöközöröñ ambazip kalem engizei, Anutunöñ monö i jöpaköm engimakza. Miañğöra nalukñini kunñan kuñgum engizawanğöra aka uruyahöt qakñe kude alme. Mi kik-kukñinambuk kude alme.

⁸Uruawam qakñe kötönñini gwötpuk algetka Anutunöñ monö köhöiba kalem möriamñi pakpak mem sehim engimakña. Mewö enggiiga malmal pakpak miañğöreñ yuaigöra osimei, mi pakpak monö nalö dop buña qem angugetka dop köl engimakña. Mewö aiga nup ölöpñi könani könani mi ölöp megetka ölnj keleñmaleleñ asuhuma. ⁹Ekbonep mosöta naluk ketanj ketanj alakzei, mi Buña Kimbi keu ki ohoget ahözawanğö dop akze,

“Yañön amqeba kalemñi kalemñi mendenja ambazip wanapñi engimakza.

† 9.9 Sum 112.9

Ahakmemeŋi diŋdiŋi kik-kukŋi qahö mianjön mönö nalö teteköŋi qahö Anutugö jeŋe ahöm öŋgöma.”

¹⁰ *Anutunöŋ qesiŋ gilgil azigöra nene kötŋi waŋgiiga nene asuhui nemakzini, yaŋjön mönö nenegö mözöközöröŋ ahakŋei, mi mewöyök eŋgimakŋa. Mi eŋgii uruŋinan lolohoiga ölop amqeba keu kötŋi qesiŋ sehiba gilgetka ahakmeme solanŋaŋgö ölni asuhui Anutunöŋ mi mem qarii sehimakŋa. ¹¹ Mewö aketka Anutunöŋ mönö malmal pakpak miangöreŋ sehiba kötuetköm eŋgiiga ölöwahakŋe. Mewö ölop amqeba ambazip nalö dop geŋmoŋi qahö kalem gwötpuk eŋgimakŋe. Mewö aketka mi memba (Jerusalem anda) eŋgiinga ambazip gwötpukŋan kötönŋinaŋgöra aka Anutu möpöseigetka ölni eŋgöreŋ asuhumakŋa.

¹² Naŋgönaŋgö nup ki memakŋei, mianjön mönö Anutugö ambazip sarakŋan yuaigöra mözöközöröŋ aketka bauköm eŋgimakŋa. Miyök qahöpmö, miangöra “Anutu saiwap!” keu mi gwötpuk jimegöra aka ölni eŋgöreŋ asuhumakŋa.

¹³ Miangö könaŋi kewö: Naŋgönaŋgö nup ki memba mewö mianjön mötnaripŋinaŋgö könaŋi kondelgetka ambazip gwötpukŋan mi eka Anutu tem kölmeaŋgöra möpöseim waŋgiba kewö jime, “Korint yeŋjön mönö Kraistkö Ölöwak Buŋaŋi keunöhök qahö jim miwikŋaizemö, Polgö keuŋi geŋmoŋi qahö tem köla amqeba sakalakŋi aka neŋgöra aka tosatŋi pakpak yeŋgöra kalem jesöŋgö eŋgimakze.”

¹⁴ Mewö jiba eŋgöra köuluköba miangöreŋ waikŋini gwötpuk mem eŋgiba kewö jime, “Ia! Anutunöŋ mönö kalem möriamŋi keleŋmaleleŋ Korint eŋgiiga urukalemŋinaŋgö ölni gwötpuk neŋgiget.” Mewö jigetka Anutugö kalemŋan aukŋe asuhuma. ¹⁵ O nini Anutu kalemŋaŋgöra aka möpöseimakin. Yaŋgö kalemŋi Jisös Kraistnöŋ mönö qetpuk sorok akza. Naŋgönaŋgö almeaŋgö keuŋi mi mewö kaba teköza.

Polgö nupköra keu jigetka likeŋni meleŋnök.

10 ¹ Tosatŋan eŋgö sutŋine nöŋgöra kewö jimakze: Mesohol köl aŋguba köhöikŋi tandök qahö akzapmö, kungen anda miangöreŋ mönö keu köhöikŋanök jim neŋgimakza. Mewö jimakzemö, Kraistnöŋ ak kömumba guŋböŋjönjön niŋgimakzawi, nöŋjön mönö miangö qakŋe nanak uruŋini kewögöra kuŋgumam:

² Tosatŋi mienjön neŋgöra kewö tandök mötmöriba jimakze, “Pol aka yaŋgö neŋakurupŋi yeŋjön gölmegö ahakmeme tandök wuatangöba nanŋinaŋgöra mötmöriba ahakze.” Nöŋjön eŋgöreŋ kaba keu mewö jimakzei, i mönö tembul eŋgiba awösamkakak kinda jim eŋgimamgö mötzalmö, töndup uruŋini köhöikŋi kötökŋi kuŋguba jim eŋgimamgö töközal. Miangöra iŋini ambazip nöŋgöra keu mewö jimakzei, i mönö

* 9.10 Ais 55.10

zilarj andö engume. Keuñini mewö mindiŋgögetka engeki urunan mönö luai qei sutñine kaba böñjöh malmam.

³Ölña, ahakmemeni gölmenöh ahakzalmö, mi töndup nanaŋgöra aka gölmegö ahakmeme bölöŋaŋgö dop bim qahö qemakzal. Mewö qahöpmö, Anutugö suahö galöm aka kerökurupji kiripo kuŋgum engiba mianggöreŋ areŋ sarakñi wuatangöba bim qemakzal. ⁴Gölme ambazip uruñini walŋaŋgö dop bimgö yuaiñi pakpak miambuk bim qemakzin. Yarö azi yeñön jakömbuak ain selji selji eriba köndeŋgetka erakzemö, Anutunöh timbi saiwanji kukñinambuk neŋgii inahöm neŋgigetka miangñön mönö kerök yeŋgö keu areñini pöwöwöm köhöikñi kuŋguba qeapköinga erakze.

⁵Urumelenğö kopa yeñön Anutugö könañi möt kutubepuköra aka nanñini silenini memba öngöba mötmötñini közamböta liklak ahakzemö, neñön yeŋgö kiripo areñini goŋgoñi pakpak mi qeapköba köndeŋninga erakze. Ambazipnöh keu mötmötñini bölöñi meraköba jöhömegöra köna kondel engiinga ölop keuñini pakpak Kraist tem köl waŋgimakingö dop mötmörimakje.

⁶Mewö mötmöriba Korint iñini mutuk Kraistkö keu pakpak tem köla aposol nupni naŋgömegöra mambötzin. Iñini uruñini mewö kunbuk melengetkun nini mönö qegetal ambazip yeŋgö keuñini pakpak kewöta jim teköba likepñi melenj engibingö jöjöröba maljin. Mewö.

⁷Iñini yuai pakpak mönö silegörök kude eka kewötme. Sutñine ahakmeme sohomakzawi, miangö könañi öljñi mönö mötmörime. Tosatñan sutñine ni memba et ala nanñini Kraistkö jitñememeurupji akzeangöra uruyahöt qahö aka möt köhöize ewö, yeñön mönö toroqeba nöŋgöra mewöyök kewö mötmörime: Yeñön Kraistkö buñañi akzei, nöñön mönö mewöyök Kraistkö buñaya akzal.

⁸Kembunöh kewögöra kukösum niŋgiyök: Iñini mem et al engimamgöra qahöpmö, mönö uruñini möhamgöbi köhöimegöra aka maljal. Miangöra kukösum miangöra aiweliköba koŋaŋ ewö sileni memba öngöba terereibileŋak ewö, mi töndup mönö gamu kun qahö miwikñaibileŋak. ⁹Kimbiñi kimbiñi ohoba albi oyoŋda kukösumni mötketka keŋgöt mötmöt mem engibileŋbuk. Miangöra keu mi nalö kewöŋe qahö toroqeba jimam. Mewö.

¹⁰Tosatñan keu kewö jimakze: Polnöh kimbiñi mianggöreŋ mönö keu lömbötñambuk ohoba urunini ölña kuŋgumakzapmö, sutnine kini ehinga azi löwötñi akza aka keuñi jii möringa qetpuk qahö akza. ¹¹Nöñön keu miangö likepñi kewö jimam: Keuñini omanji mönö mosöta nöŋgö könanangöra kewö mötmörime: Ni kungen anda kimbinöh keuni köhöikñi ohomakzali, miangö dop mönö sutñine mala mewöyök köhöikñanök mindiŋgöm engimam.

¹²Timbiqimibilim mienñön nanñini jim ölöwak ak aŋgumakzemö, ölña ni nongita aposol qetpuk akeak ewö, nöñön mönö gamuni mötpileŋak.

Mewö aiga nani aka engö silikɲini likeplikep ala kewötmamgö qötötangöba kölköldömdöm akileɲjakmö, yeɲön mönö mötmötɲini töröpɲi wuatangöba nanɲini imbiɲinanɲö dop uruɲini dop ala kewörakze. Ahakmemenini mewö laɲ kewöta “Pol ongitzin,” jiba uruölöwak mörakze. Keu omaɲi mewö jiba uruqahö akze. Anutugö dopnöh kewöt niɲgigetka ölop engongita maljal.

¹³ Anutunöh nup memegö jaböɲi al niɲgiyöhi, mi qahö ongita sileni gwötpuk möpöseimamgöra qahö mötzal. Anutunöh nup meme areɲni al niɲgii memakzali, miangö dop mönö engö sutɲine mewöyök nup memakzal aka miangö ölnangörök mönö sileni möpöseimakzal.

¹⁴ Tosatɲan keu kewö jim sohomakze, “Polnöh Korint sutɲine nup meyöhangöra sileɲi möpöseii qahö dop kölja. Anutunöh gölme mesinɲa nup memapkö jabö al waɲgiyöhi, Polnöh mi ongita laɲlaɲ walöɲmakza.” Yeɲön mutuhök nup sutɲine qahö megetmö, töndup ni mem et al niɲgiba nanɲini sileɲini keunöhök jiba möpöseimakze. Nöhön Kraistkö Ölöwak Buɲa jim sehiba anda mala mutuk Korint engöreɲ kaba urugö nup meal. Mutuk qahö kabileɲak ewö, timbiqimibilim böhi mienöhön nöngö keuni mewö jigetka dop köli nööhön nani könanangö könaɲi jiba jim sohibileɲak.

¹⁵ Anutunöh gölme mesinɲa nup memegö jabö al engiyöhi, yeɲön selɲini mi walöɲda engö sutɲine kaba urugö nup memakze. Nanak selni qahö walöɲda tosatɲi yeɲgö sutɲine nup mealangöra sileni qahö möpöseimakzal. Böhi tosatɲan urugö nup memba malgeri, miangöra mewöyök sileni qahö möpöseimakzal. Engö sutɲine mutuk nup mealangöra mewö akiga ölop dop kölja. Anutugö areɲi wuatangöba sutɲine nup memba malinga mötnariɲɲinan toroqeba qariiga nanɲgöm neɲgimegöra mamböta jörömqöröm akzal.

¹⁶ Nanɲgöm neɲgigetka ölop gölmeɲi gölmeɲi Korint likeɲɲine Not göröken ahözei, mönö enduyangöreɲ mewöyök anda Ölöwak Buɲa jim asaribin. Nupninan mewö qariiga andöqe qe keunɲinan teköma. Anutunöh tosatɲi yeɲgö nup meme jaböɲini al engii megetka ölni lök asuhuyöhi, miangöra nani sileni möpöseimamgöra qahö mötzal.

¹⁷x Mewö qahöpmö, Buɲa keu kiangö dop akɲamgö mötzal, “Kunɲan sileɲi möpöseimamgö mötzawi, yaɲön mönö Kembugö nupkö ölnangöra aka sileɲi möpöseii dop kölma.” ¹⁸ Keu miangö könaɲi kewö: Nanɲini jim ölöwak ak aɲgumakzeanöh mönö Anutugö jeɲe qahö dop köljemö, Kembunöh niɲia jim ölöwak ak waɲgimawi, yaɲön mönö esapesapnöh köhöiba kinma. Mewö.

Aposol takapulakanɲi yeɲön tilipköm engibepuk.

11 ¹ Nöhön borom kun uruqahö keu qakɲe silememe aki miangöra mönö kude möt lömbörime. Mi töndup ni kude andö nuɲguze,

x 10.17 Jer 9.24

mötzal. ²Nöñön iñini azi mohot Kraist yanğö buñañi aketka ambi seram jömukñi sarakñi ewö engibiga yanğönök engömemapkö keunji jiba jöhöyal. Miangöra Anutunöñ uruñan engöra aka mututqutut mörakzawi, nöñön mönö miangö dop tosatñan kelök keunöñ jiba engömeget bölibepuköra waimanjat mörakzal.

³Kewögöra waimanjat mörakzal: Mokoleñnöñ isimkakalek aiga Iwnöñ (Ewanöñ) böliyöhi, miangö dop timbiqimibilim yeñön mewö me mewö jiba tilipköba engömegetka uruñinan tölöhoiga janjuñ akepuk.

⁴Miangö könani kewö: Tosatñan kaba Jisös jim asariini, mi qahöpmö, Jisös murutñi kungö könani jim sehiba malgetka yeñgöra qahö mötket lömböriza. Uña Töröñi buña qem angugeri, mi qahöpmö, öme kunöñ tosatñi engö uruñine gei lolonqalon mala miangöra töndup köñjiliñ qahö mötze. Ölöwak Buña möt angön kölgeri, mi qahöpmö, keu tandökñi kun qetñanök Ölöwak Buña qeta lañ jigetka tosatñan mi awamñanök möt angön kölakze. Mewö asuhumakzawañgöra mönö töndup waimanjat kun qahö akze.

⁵Miangöra waimanjat mörakzalmö, ahakmemeni mewö me mewö kewötketka etqegeñi qahö akzal. Tosatñan aposol qet memba timbiqimibilim lañ ahakzei, nöñön mönö yeñgö nembö bapñine qahöpmahöp maljal. ⁶Keu niñgizei, miangö likepñi kewö jizal: Keu ölop sorokñi jijigö tandökñi mi ölop qahö mötzalmö, Buña keugö könani mönö möt soroközal. Mi mönö nalö dop pöndañ aukñe indelbiga möt yaköze.

⁷Iñini mem wahöt engimamgö möta nani mem et al anguba malmalni nanğömamgöra nup memba malal. Miangöra Anutugö Ölöwak Buña mi engöra söñgöronñi qahö jim asarim engiba malal. Mewö aka malalangöra tosatñan nöñgöra uruqahö keu kewö jimakze, “Polnöñ mönö köna onğita siñgisöndok ahakza.” ⁸Urumeleñ könagesö tosatñe nup qahö membiga töndup nalukñini öne niñgigetka membi nanğöm niñgiiga iñini welen qem engiba malal. Tosatñan miangöra kewö jimakze, “Polnöñ yonğorö nene silik tandök ak engiba malja. Miangöra aposol qahö akzapmö, nanñi nupña memakza.” Nöñgöra mewö jiba jim sohomakze.

⁹Embuk mala yuaigöra osiba mözöröngöba miangöreñ mönö engöreñök kun qahö kuñguba mem lömböriba nene yuañi qahö memba malal. Mewö qahöpmö, urumeleñ alaurup Masedonia prowinsnöhök kaba yuaigöra osiali, mi ek asariba moneñ niñgigetka dop kölök. Ahakmemeni pakpak miangöreñ mem lömbörim engibilenbuköra möta galöm mem anguba malal aka mewö toroqeba malmam.

¹⁰Mem lömbörim engibilenbukö keuni miangöra mönö nani sileni memba öngöba maljal. Kunñan keuni mi Akaia prowinsñinangö gölmeñi gölmeñi pakpak miangöreñ qeapkömamgö osima. Kraistkö keu öljan

mönö nam köl niŋgiiga keu mewö jöhöba jiba kinjal. ¹¹Mi wuanöngöra? Mi iŋini qahö jöpaköm engibilerjak, miaŋgöra me? Mönö ölna jöpaköm engimakzali, mi Anutunöŋ mötza.

¹²Aposol sesekŋai ewö ahakzei, yeŋön nembuk “Öröröŋ akingö nup tandök miyöhök memakzin,” mewö jibingö mötze. Miaŋgöra kewö kuŋgum engimakze, “Polgö tandök ewö nup memakzinaŋgöra mönö Pol ewö naŋgöm nengime.” Nupŋinaŋgöra sileŋini möpöseibingö möta miaŋgö könaji jarumakzemö, mi ölop qahö miwikŋaime. Nöŋön i ewö qahö akzal. Miaŋgöra mem lömbörim engibilerbuköra mönö nani galöm mem aŋguba maljal aka toroqeba mewö malmam.

¹³Yeŋön aposol ölni qahöpmö, mönö aposol takapulakani aka nup meme ambazip isimkakalekŋinambuk akze. Kraistkö aposol neŋgö tandök kondel aŋguba nup laŋ memakze. ¹⁴Satanöŋ nanŋak asakŋaŋgö garata tandök ewö kondel aŋguba nup laŋ memakza. Miaŋgöra timbiqimbiŋ mieŋön mewö akerangöra qahö welipkömakin.

¹⁵Miaŋgöra Satangö welenqege ambazipurup mieŋön ambazip welenŋini qebingö tandöktandök aka Köna keu wuatangöba mewö miaŋön solanŋi akŋegöra jim sohoba kondel aŋgumakze. Mewö nup laŋ memakzeangöra mönö qahö auruba welipkömakzin. Silememe mewö ahakzemö, nalö teteköŋe Anutunöŋ mönö likeŋi ahakmemeŋinaŋgö dop meleŋ engima. Mewö.

Polnöŋ aposol nup memba sihimbölä gwötpuk mörök.

¹⁶Keuni kunbuk kewö jimam: Engöreŋök tosatŋan nöŋön uruqahö maljal, mewö mötmöribeak. Mewö mötmöribeak ewö, ni mönö uruqahö azigö tandök köl öröm niŋgime. Mewö aketka ölop i ewö nani sileni memba öngöba sutŋine malmam. ¹⁷Awösamakak ketanŋi möta sileni memba öngöba keuni jizali, mi Kembugö mötmöt sihimŋaŋgö dop qahöpmö, mi uruqahö azigö tandök ewö jizal.

¹⁸Ambazip gwötpukŋan sutŋine gölmegö ahakmeme bölöŋi wuatangöba sileŋini memba öngömakzei, miaŋgöra nöŋön mönö mewöŋanök aka keuni miaŋgö dop jizal. ¹⁹Nanŋinak “Mötmöt ambazip öngöŋgöŋi akzin,” jizeangöra mönö uruqahö ambazip yeŋgöra mötketka qahö lömbörimakza.

²⁰Iŋini öl közömŋa kewö akze: Ambazip kewöŋi yeŋgöra mötketka uruŋinan qahö lömbörimakza: Kunŋan engömemba jöhöiga welenqegeurupŋi etqeŋeŋi akze. Kunŋan tutuhum engiba nenenŋini nem tekömakza. Kunŋan jim kelök ak engiiga buŋanŋi akze. Kunŋan nanŋi sileŋi memba öngöba keu töhöreŋ jiba nuŋgulumŋini qekötahömakza.

²¹I ewö öröm ureim ak engimangöra mönö lölöwöröŋi aka malal. Ösöŋ ak engialangöra “Keŋgöt moröya akza,” jiba nöŋgöra mewö mötmörize me qahö? Keu mewö jiba miaŋön ölop gamu qem niŋgimeangö dop akzal

me? Keu jimami, mi mönö uruqahö azigö dop jimam. Timbiqimbilim yejön nup memakzeangöra silejini memba öngömögöra gamuñini qahö mötze ewö, nöjön mönö mewöyök nupnañgöra aka sileni memba öngömamgö möt köhöimakzal.

²² Yejön keu kewö jiba silejini memba öngömakze, “Nini Juda ambazip aka Hibu keu jimakzin.” Mewö jimakzemö, nia kun mewöyök akzal. “Israel ambazip akzin,” jimakzemö, nia kun mewöyök akzal. “Abrahamgö isi amböurupji akzin,” jimakzemö, nia kun mewöyök akzal.

²³ “Keu kun mi uruqahö azigö keu tandök ewö jimam, “Yejön Kraistkö nupji memakzin,” jimakzemö, nöjön mi mönö i luhut ala engongita memakzal. Nöjön mönö ambazip mi engongita nup köhöiba memba malal. Kraistkö nupköra aka kösö mire al niñgigetka miangörej i engongita nalö gwötpuk taral. Ihilek wahiñambuknöñ mönö könöruk könöruk nuñguba malget. Nalöñi nalöñi lömböt miwikñaiba kömumamgö dop aka malal.

²⁴ ^b Juda jike galöm tosatjan jigetka arawambu kömbinöñ nuñgugetka areñi 39 aiga sihimbölöñi möta malal. Mewö ak niñgigetka indimñi 5 ahök. ²⁵ “Rom gawman yejön jigetka ihilek wölkznöñ nuñgugetka indimñi karöbut ahök. Sömañi mohot kötnöñ nuñgugetka kömumamgöra ahal. Wañge ketaje malbiga köwet töromnöñ kuñguba qaköba jömgöiga indimñi karöbut ahök. Nalö kunöñ wañge jömgöiga köwetnöñ geba silimñi mohot aka suñgemñi kun köwet qakje lañ malal.

²⁶ ^d Nalöñi nalöñi köna anda kaba malal. O töwatji töwatji (göwöñi göwöñi) kutuba miangörej lömböt miwikñaiba ayuhumamgö dop aka malal. Kegwek-kahasiliñ ambazip yeñgöra aka kömumamgö keñgötñi möta malal. Juda könagesöurupni yeñgöra aka lömböt miwikñaiba ayuhumamgö dop aka malal. Kian kantri yeñgöra aka lömböt miwikñaiba ayuhumamgö dop aka malal. Taonñi taonñi miangörej lömböt miwikñaiba ayuhumamgö dop aka malal. Arökñangö miriñi miriñi miangörej lömböt miwikñaiba ayuhumamgö dop aka malal. Köwet kutuba anda miangörej lömböt miwikñaiba ayuhumamgö dop aka malal. Alaurup takapulakañi yejön nuñguget kömumbilenbuköra wösöni kot gwözöñniga malal.

²⁷ Malmalni nanngömamgöra nup köhöiba memba malal. Gaun guli gwötpuk malal. Nup gwötpuk mealangöra nenegö nalöni qahö ahöiga nenegö kömumba ogö kömumba malal. Nene qahöwahiga nalö gwötpuk bödi aka malal. Opo malukugöra osiba sanjenñi möta malal. ²⁸ Miyök pakpak qahöpmö, toroqeba kewö möta malal: Urumeleñ könagesöñi könagesöñi pakpak yejön waimanjatñini jigetka urunan mönö nalö dop möt lömböriba malal.

^a 11.23 Apo 16.23 ^b 11.24 Dut 25.3 ^c 11.25 Apo 16.22; 14.19 ^d 11.26 Apo 9.23; 14.15

²⁹Mötnarip alaurup denike yeñon sörauba löwörize ewö, nöñon mönö mewöñanök i uru al engizal. Kunjan kölgorom aliga urumelej alanan siñgisöndok akzawi, siñgisöndok miangö könöpñan mönö nöñgö uruni mewöyök nohoiga tembulakzal.

³⁰Silememe keuyök mönö mötpingö ak engiza. Miangöra sileni memba öñgömamañgö dop akileñak ewö, ni memba et al niñgigetka ösumeret tandök akzali mönö miangöra aka sileni memba öñgömakzal.

³¹Kembu Jisösgö Iwi Anutuñi nalö dop möpöseininga teteköñi qahö aködamunñambuk mal öñgömawi, yañon mönö nöñgö könanjamni möri muney keu qahöpmö, keu öñji mi jizal.

³²^eDamaskus sitinöñ malbiga kiñ Aretasgö kiapñan mönö buldömin aziurupñan nömmimba jöhöm niñgimegö jim kutum engiiga Damaskus ambazip yeñgö siti sel nañguñe mönimba ölöñ köla anbileñbuköra galöm memba kinget. ³³Mewö kingetmö, alaurupnan nömmemba sakapnöñ al niñgiba kösönöñ jöhöba siti sel jeñgenañeyök ösöñösöñ algetka gölmenöñ eta köla böröñeyök ölöñ köla kayal. Mewö.

Polnöñ jemelej imut eka indelindel keu mörök.

12 ¹Engö silememe alaurupñinan jemelenjö keuñi keuñi jimakzei, miangöra nöñon mewöyök sileni möpöseiba jemelenjö keuni jimam. Keu mi ölop qahö bauköm engimapmö, töndup keu toroqeba jemelej imutñi imutñi eki Kembunöñ keuñini indeli mörali, miangö kösohotñi jimam. ²Azi kun möt wañgibi Kraistpuk qekötahöba malja. Uña Töröñan i wañgiriga gölmegö kousu luhut jaböñi oñgita öñgöba señgelau jaböñi oñgita öñgöba Anutu nanñangö Suep miri uruñe eu öñgöyök. Nalö miangöreñök yambu 14 lök teköi maljin. Silebuk me sileñi qahö uñañanök öñgöyöhi, mi qahö mötzal. Anutunöñ mi mötza.

³⁻⁴Uña Töröñan azi mi wañgiri Anutugö oyaenköyaen miriñe öñgöi keu qainñi kun jigetka mörök. Gölmee azi nöñon keu mi jimamgö soñgo ahöza aka keu mi gölme ambazip neñgö keuninan jibinañgö dop qahö. Silebuk me sileñi qahö öñgöyöhi, mi Anutunöñ mötza. Nöñon mi qahö mötzalmö, yañgö kösohotñi mötzal.

⁵Nöñon azi yañgöreñ yuai asuhuyöhi, miangöra sileni memba öñgömamañgö dop akzal. Nanangöra mi asuhuyökmö, töndup miangöra aka nani sileni qahö möpöseimakzal. Miangöra qahöpmö, ösumeret akzalañgörök mönö mewö ahakzal.

⁶Nanangöra sileni mewöyök memba öñgömamgö mötpileñak ewö, keuni mönö keu öljangö dop jibileñak. Mewö keu omanji jiji asia qahö akileñakmö, mi kewögöra köyatim angumakzal: Körek eñon jemelenji mi ehalangöra keu diñdiñi oñgita nöñgöra mötket öñgöñgöñi akileñbuk.

^e 11.32-33 Apo 9.23-25

Ahakmemeni aki eketka keu jibi mötkeri, mönö miangö dowök kewöt niŋgimegöra mötzal.

⁷Indelindel keu öngöngöni mötŋi keu tosatŋi öngirakzawi, miangöra aiweliköm aŋgubilenbuköra Anutunöŋ yuai jitrjambuk nöŋgö silene aliga kondi sötmanö dop nuŋgumakza. Satangö garatanöŋ sihimbölö mi niŋgiiga mörakzal. ⁸Miangöra Kembunöŋ mi sileneyök mem gilmapköra köuluköbiga indimŋi karöbut ahök.

⁹Mewö köuluköyalmö, keu kewö jii möral, “Qahö. Ösumeret aknöŋga nöŋgö kukösumnan mönö amqeba urugi kokolak qeiga aködamungabuk ahakŋan. Miangöra nöŋgö kalem möriamni mönö buŋa qem aŋgunöŋga dop köлма.” Keu mi jii möta Kraistkö kukösumŋan qakne öngömapköra mörakzal. Miangöra ösumeret ahakzalaŋgöra sileni möpöseimakzal. Lömböt mi qahöwakŋapköra qahö toroqeba köulukömakzal.

¹⁰Kraistnöŋ ni ösumeret ahakzali, nalö miangöreŋ ösum niŋgiiga köhöiba kinakzal. Miangöra ösumeret akzalaŋgöra töndup mötŋi dop köli siksuk qahö akzal. Tosatŋan uruqeŋ keu töhöreŋ jim niŋgigetka mötŋi dop köl niŋgiza. Kraistköra aka kahasililiŋ sesewerowero ak niŋgigetka wahöjalin möta miangöreŋ töndup urubönjöŋ miwikŋaimakzal. Mewö.

Polnöŋ Korint yeŋgöra waimanjat mörök?

¹¹Sileni memba öngöba mönö uruqahö tandök akzal. Diŋgimegöra aka köna murutŋi kun qahö miwikŋaiba nöŋgöra mötket öngömapköra mi jizal. Ölna, Anutunöŋ qahö bauköm niŋgibawak ewö, nanak mönö yuai kun qahö aki andöqeŋ keuŋinan ölni akawak. Ölni akawakmö, ahakmemeni mewö me mewö kewötzali, mönö etqeŋeŋi qahö akzal. Tosatŋan aposol qetpukö qet memba timbiqimibilim laŋ maljei, nöŋön mönö yeŋgö nembö bapŋine qahöpmahöp maljal.

¹²Engö sutŋine nup memba lömböt gwötpuk möta mökösoŋda malali, miangöreŋ Anutugö kukösumŋan sölölohöm niŋgiiga aŋgöletot aiwesök könaŋi könaŋi asuhuget. Ahakmeme mianöŋ mönö aposol akzalaŋgö könaŋi kondel eŋgiiga eket.

¹³Iŋini bauköm eŋgial aka urumelen könagesö tosatŋi mi embuk öröröŋ ak eŋgial. Tosatŋi eŋgömembu wahötketka iŋini mönö denöwö eŋgömosötŋi öne malbeak? Ölna, naŋgöm niŋgimegö lömbötŋi mi eŋgö qakŋine qahö alal. Aposol takapulakaŋi yeŋön lömböt mi eŋgö qakŋine alakzemö, nöŋön mi tosatŋi yeŋgö qakŋine albi bisimakze. Naŋgöm niŋgimegöra qahö kuŋgum eŋgiba mewö köpösihit ak eŋgial me? Miangöra “Polnöŋ köpösihit azia akza,” jibeak, mönö pinjitni mi mosötmegöra qesim eŋgizal.

¹⁴Mötket, nalö kewöŋe kunbuk eŋgöreŋ kamamgö jöjöröbiga indimŋi karöbut akŋa. Kaba nupni naŋgömegö lömbötŋi mi dumŋe kunbuk eŋgö qakŋine qahö almam. Mi qahö. Nanŋini sukinapŋinaŋgöra qahö

köpösöngömakzalmö, nanñinak mönö nöngöra ak engimapköra mötzal. Nahönbörat yeñon iwinamurupñini nanğöba inap tokoba engimeanğö dop qahö akzemö, iwinam yeñon mönö mi nahönböraturupñini yeñgöra tokogetka dop kölja. Mianğö dop urugö nupnön göröken nönön iwinjini akzal. Mianğöra urunöñ göröken bauköm engimamğö mötzal.

¹⁵ Mianğöra eñon ölöwakñegöra yuaini pakpak mi sösöngai qakñe tököm engibi engö buña akñapaköra mötzal. Nani malmalni mewöñanök ölöwakñegöra mosötmamğö mötzal. Mewö önöñi qahö jöpaköm engibi urukalemnan qarimakzampö, engö urukalemñinan mönö töndup wuanöñgöra wazimakza?

¹⁶ Ölna, nanğöm niñgimeğö lömbötñi mi engö qakñine qahö alal. Nöngö tuarenjoñurupnan keu mianğöra urumohot akzemö, tosatñan kewö jibeak, “Pol mi mötmöt azia aka tilipqilipñambuk uruñini mezañda köpeim engiba moneñini mewö me mewö örömakza.” Keu mianñon ölni qahö. ¹⁷ Mi denöwögöra jize? Neñakurupni melaim engibiga engöreñ kageri, yeñgöreñök kunñan Pol inap wañgimeğöra kuñgum engiyök me qahö? Qahö. ¹⁸ Taitus engöreñ kamapkö kuñgum wañgiba urumeleñ ala kun yambuk melaibi kayohot. Taitusnön ni inap niñgimeğö kuñgum engiyök me qahö? Qahö. Uña mohot mianñon mönö sölölohöm netkiiga nup nanğönanğögö köna mohot anda kaba malit. Mewö.

Polnöñ mönö Anutugö kukösum qakñe kama.

¹⁹ Kimbi ki oyonđa mianğöreñ nöngöra kewö mötmöríbepuk, “Keu jim enğıinga mianğö likepña kapañ köla jiba mewö ohoza.” O wölböt alaurupni, mianğöra kewö jimam: Mönö Kraistpuk qekötahöba keuni Anutugö jemesoholñe jiba ohoyal. Nupnini pakpak mi eñon uruñini möhamğöba köhököhöi miwikñaimegöra memakzin.

²⁰ Engöreñ kaba eki ahakmemeñini tökömakzali, mi wuatangöba malbepuk. Mewö miwikñaim engibileñbuköra waimanjat mötzal. Ahakmemeñinanğö likepñi meleñ engibi qakñine öngömawi, eñon mönö tandök akñami, mi tökömegöra mötzal. Sutñine ahakmeme kewö akepuköra goro mötzal: Urunöñ mututqutut aka aņgururuk akepuk. Urusingok aka yom jibepuk. Silenöñ alal ak aņguba denđa nanñini kambugörök mötmöriba malbepuk. Andöqeçe keu töhöreñ jiba mianñon mem bölim aņgubepuk. Tosatñi yeñgö keuñini tölapñe jigetka diwoñdawoñ anbapuk. Jakbak-orañbörañ aka areñi törörök qahö wuatangöba nanñini imbi-imbi lañ malbepuk.

²¹ Mewö aka malme ewö, nönön mönö kewö asuhumapköra waimanjat möta kamam: Ambazip gwötpukñan mutuk siñgisöndok aka malgeri, yeñgöra mönö urukömbuk aka sahötpileñbuk. Ahakmeme töwötñambuk lañ wuatangöba sihimñini kömböñañi miwikñaimegöra serowilin akerangöra gamu qahö möta qahö möt bölim aņguget. Sutñine kabiga

uruḡini kunbuk qahö meleşget engekiga Anutunöḡ mönö uruni kuḡḡui kunbuk urueret akileḡbuk. Mewö.

Galöm meme keu qöndökḡi

13 ¹Nalö kewöḡe enḡöreḡ kabiga indimḡi karöbut akḡa. “Keuḡö jakeḡe alalgö keuḡi pakpak mi mönö ambazip yahöt me karöbutḡan naḡḡöba jigetka köhöimakza.” ²Nöḡön Buḡa keu miaḡḡö dop akzal. Enḡö sutḡine malbi indimḡi yahöt aiga miaḡḡöreḡ lök galöm meme keu enḡial. Keu mi nalö kewöḡe kunbuk köl guliba qelḡḡeyök jizali, miaḡḡön teköza. Miaḡḡöra kunbuk kamami, nalö miaḡḡöreḡ ambazip siḡḡisöndok mutuk akeri me akzei, mi mönö qahö enḡehorimam. Bölöḡamḡinambuk iḡini mönö körek mindiḡḡöm enḡimam.

³Kraistnöḡ mönö ösumeret qakḡe qahö ak enḡimakzapmö, kukösumḡi sutḡine kondelakza. Kraist miaḡḡönök mönö sölölohöm niḡḡiiga aposol aka keu jimakzali, iḡini miaḡḡö könaḡḡöḡöra uruyahöt aka kapaḡ köla qesim aḡḡumakze. Miaḡḡöra silikḡinaḡḡö dop mönö keu enḡiba mindiḡḡöm enḡimam.

⁴Kraist maripomnöḡ qegetka kömuyöhi, nalö miaḡḡöreḡ mönö ösumeret tandök malökmö, töndup Anutugö kukösumḡan nam köl waḡḡiiga mal köhöiza. Nöḡön mewöḡanök yambuk qekötahöba nani ösumeret aka maljalmö, Anutugö kukösumḡan mönö nam köl niḡḡiiga Kraistkö jitḡi memba mindiḡḡöm enḡimamḡö mal köhöizal.

Mönö nanḡini kewöt aḡḡuba uruḡini meleşme.

⁵Mönö nanḡini törörök kewöt aḡḡume. Uruḡini meleşda öḡḡa Kraist möt narize me qahö, miaḡḡöra mönö esapesapnöḡ ala kewöt aḡḡume. Kraist Jisöḡö Uḡaḡan uruḡine mal köhöizawi, mi möt kutuze me qahö? Uruḡine qahö malja ewö, iḡini mönö esapesap miaḡḡöreḡ et enḡuiga Kraistkö buḡaya qahö akze. ⁶Nöḡön enḡöreḡ aposol öḡḡi akzal me qahö, iḡini mewö kewöt niḡḡigetka esapesap miaḡḡöreḡ kude eta nuḡḡuma, mewö mötzal. Iḡini nöḡḡö könani mewö aukḡe eka möt kutumegöra jörömḡöröm aka maljal. Miaḡḡöra mindiḡḡöm enḡibi öḡḡa dop köḡma.

⁷Keu pakpak ohoba kotzali, mi ak sohobepuköra Anutu köuluközin. Keu kun jim sohoba malgetka kaba mindiḡḡöm enḡibiga tuarenḡoruḡupnan mönö aposol kukösumni öḡḡa eka ek asarime. Mewö asuhumapköra qahö köuluközal. Iḡini qahö mindiḡḡöm enḡimamaḡḡö dop nekepuköra qahö köuluközalmö, enḡön urumeleḡ diḡḡiḡi akḡegöra köuluközal. Uruḡini öḡḡa meleşme ewö, nöḡön mönö qahö mindiḡḡöm enḡibi tuarenḡoruḡupnan nöḡḡöra toroqeba azi lölöwöröḡi tandök ewö mötpeakmö, mi muat.

^f 13.1 Dut 17.6; 19.15

⁸Nini keu ölji qetala kun uteköbingö osibinmö, keu öljan sehimapköra ölop kinbin. ⁹Nöjön kukösumni qahö kondela ösumeret tandök malbiga ejön köhöiba kinmei, nalö mewöje mönö sösöngai ahakin. Urumelenjö aködamunjni körek miwikjaiba köhöiba kinmegöra nejön Anutu köulukömazin. ¹⁰Kembunöj injini memba et al engimangöra qahöpmö, urujini möhamgöbi köhöimegöra möta kukösumnji mi al niñgiyök. Kukösum miañgö qakje kinda engöreñ kamami, nalö miañgöreñ könöpuk ak engibileñbuköra mönö keu ki köröwen mala engöra kimbi ohozal. Nanñinak mindiñgöm añgume ewö, mönö ösöñ ak engimam. Mewö.

Yaizözkök keu teteköñi

¹¹O urumelenj alaurupni, keuni jim teköba qambañ kewö engizal: Mönö söñgaiba malme. Könañamjni sohoyöhi, mi mönö körek mindiñgöm teköme. Urukunğukunğu keu engizali, mi mönö buña qem añguba tem kölme. Keu jiali, miañgöreñ mönö urumohot aka luainöj malme. Mewö aketka Anutu jöpaköm añgumegöra inahöm neñgiba luai qem neñgimawi, yañön mönö embuk malma.

¹²Injini urumelenj alaurupjni yembuk jölöñini jiba mönö köna sarakñi wuatangöba jölöñini jiba añgum añguba numbuñini yöhötim namba malme. Anutugö ambazip sarakñi pakpak ki maljei, yejön yaizözkökñini algetka engöreñ kaza.

¹³⁻¹⁴Kembu Jisös Kraistnöj mönö kalem möriamñi enñgiiga Anutugö urujöpakñan nam köl enñgiiga Uña Töröñan körek inahöm enñgiiga urumohot aka köisirik malme. Mewö.